



卷之十九
人物志
儒林志

文苑

ル 5
3258
19



門 儿 5
號 3258
卷 19

黃州府志卷之十九

黃州府知府英 啟纂輯

人物志

儒林

明

黃岡縣

郭慶字善甫正德丁卯舉人質直力學時王守仁倡道東南慶
徒步往從之三年始歸充然有得也授清平知縣有冰檠稱
勤於撫字捐俸給貧民牛種後乞休歸民不忍舍為立祠祀
之家居不治垣屋澹泊自守戚里有困置輒賙給焉耽吟詠
每詩成常自削稿故著述不多見云卒祀鄉賢孫知易詳宦

黃州府志卷之十九 儒林

昭和十一年
十月八日
購

蹟

吳良吉字仲修號石梁師事王守仁講良知學家貧授生徒架
幾疑然而純粹可掬學者暱就之作詩歌有邵堯夫風孟津
宰黃岡延之書院有暮夜懷金請閉者力卻之及卒耿定向
備棺斂爲作傳知府瞿汝稷誌其墓著有居湖集祀鄉賢
王陞字進吾萬曆己卯舉人學宗湛若水隨處必求天理爲安
授威遠知縣捐俸振饑轉泗州知州濬周家橋以殺水患歷
重慶遵義府同知皆有政績致仕歸率子弟講學於正宗會
館著有退省錄退問集綱鑑讀要諸書卒祀鄉賢子家欽字
仲修孝友文章一時推重知府祝萬齡聘主講定惠院亦祀
鄉賢孫源昌詳宦蹟

樊煒字崙川祖模以孝友稱煒萬曆己卯拔貢生講良知學博
通經史授漢陽訓導教諸生以篤行監司守令折節禮之弟
子一秉程度遷興隆衛教授致仕歸著有史學集等書祀鄉
賢子玉衡詳忠義玉衡詳宦蹟玉衡詳篤行

案煒歸田後繪柱下史於堂配以漆園東方希夷康節四
先生焚香抱膝相對時長子玉衡以疏請建儲被譴過省
謝不孝公曰我顧不滂母若哉其侍父病衣不解帶者七
旬母疾侍藥餌夢神人授以丸旦而母愈人以爲孝感

世泰撰
本傳

余心純字西澗萬曆壬辰進士授嘉善知縣研精禮經言動悉
遵桀矧時以戴記儒宗立坊表之初邑中於廷諍以戴記鳴

世所稱樂葵先生也心純與樊玉衡王一鳴劉功遠暨漢川尹應元同受業焉而心純所學爲尤顯有禮經搜義行於世詹時明字爾用少慕薛瑄之學求王守仁之所以異處以歲薦授常德訓導日坐堂舍與諸生講學務實踐戒浮靡遷江西武甯教諭署縣篆彌歲簿書刑獄之事一以至誠爲本擢四川筠連知縣解組歸談道講藝學者尊爲沖默先生卒祀鄉賢子謹之詳宦蹟

蕭繼忠字康侯性豪邁弱冠補諸生舉副榜先是從父文憲爲酷吏所斃其子繼元愬於朝吏疑繼忠使之誣置諸獄繼忠投獄井經宿不死遂讀易窮性命之旨旣出折節力學游燕都歷金陵豫章訪求名儒與焦竑相齟齬後講學白鹿書院

歸與郡人修問津書院門徒常數百人時附魏璫者銜楊左益摧楚士繼忠亦被逮緹騎至言動自若會魏璫誅乃免著有語錄諸書

朱荃宰字咸一崇禎己卯辟舉授武康知縣以考最赴京師卒於道囊中惟圖書而已艾南英稱其孝友廉讓留心著述於車戰舟師皆有師授著有周易內外圖說毛詩類考禮記會通孟子年表諸書皆奉敕頒行

蘄水縣

李汰字清之性謹厚敦行孝弟少失怙終身哀慕領成化丙午鄉薦任永新訓導刊小學家禮頒示學者遷義烏教諭郡守廉其貧遺金三百悉以修學宮甲子福建鄉試應同考聘有

干以私者叱遣之其人譏爲腐儒汰謝以詩曰義利源頭頗
識真黃金難換腐儒貧莫言暮夜無知者充塞乾坤有鬼神
尋致仕歸卒祀義烏名宦祠著有立菴集子宗元詳宦蹟
蔡月涇字沙江性純孝博學好古年十四割股愈母疾正德丙
子舉於鄉嘗擔囊受業於王守仁入南雍與湛若水游終身
不仕教授生徒歲至數百人生平言動無戲渝郡邑有司罕
見其面學者稱爲大隱先生著易經膚說三卷

麻城縣

毛鳳起字瑞東諸生少習舉子業後厭棄之從王守仁講學歸
而授徒作心學圖致知說以明其旨嘉靖壬辰詔舉賢良敦
行遺逸之士有司以鳳起應辭不就知縣陳子文爲建道峰

書院居之就教者益眾鳳起德性和易志行高潔孝友敦睦
老而彌篤卒後邑人於五腦山建明德堂與劉承烈並祀

劉承烈字拙齋諸生自幼受書卽以聖賢之道爲己任聞耿定
向講學執贄往師焉旣歸閉關讀書儵然自適人呼爲拙聖
著有同道錄格物解聞見錄等書

周思久字柳塘工詩善書法嘉靖癸丑進士任瓊州知府致仕
抗志希古品詣卓犖與耿定向以理學相切劘嘗謂門人歸
善楊起元曰學必求至聖賢非但欲爲鄉黨自好人也建輔
仁書院時會講焉著有柳塘遺書及石潭集卒祀鄉賢時有
王可任字重菴諸生亦潛心理學與思久及耿定向友善晚
年著讀易便覽論者謂與紫陽相發明

案思久嘗置酒飲楊起元酒酸謂之曰世人云酸秀才願子他日無忘此味也及起元館選又引山雞自矜其羽為喻以警戒之

縣志

黃安縣

耿定向字在倫三歲時有公卿到門問其祖曰更有上者否曰獨有聖賢耳曰兒當為聖賢矣由是潛心理學嘉靖丙辰成進士授行人擢御史劾太宰吳鵬六事語侵嚴嵩事既寢出按甘肅舉劾無所私去任行笥一肩有以石經饋者留境上而去尋督南京學政開崇正書院以明道彰教為己任隆慶初擢大理寺右丞與高拱忤謫橫州判官拱罷量移衡州推官萬曆中累官右副都御史吏部侍郎陸光祖為御史趙之

翰所劾光祖已留定向復頌光祖賢詆之翰給事中李以謙言定向擠言官定向求去帝不問以內艱歸起復撫閩會詔下方田法定向摹地圖揭之後屏區列其壤地高下廣狹之宜條八法下之報竣獨先廣寇林道乾訂海上定向以計討擒之丁外艱起復為南京右都御史御史王藩臣劾應天巡撫周繼疏發踰月不以白定向定向怒守故事力爭自劾求罷且詆藩臣論劾失當藩臣坐停俸二月於是新進諸臺省爭齟齬定向不休時已除定向戶部尚書督倉場定向求去益力章九上乃予告歸講學天臺山嘗謂學以悟入以修證閱七年一日整衣冠危坐而逝年七十二贈太子少保諡恭簡與弟定理定力俱祀鄉賢孫應昌詳宦蹟

明史參王錫爵撰本傳

耿定力字子健兄定向督學南畿定力以諸生從師事史桂芳友楊希洎焦竑吳自新皆以學問相砥礪隆慶辛未成進士授工部主事出爲成都知府蜀最苦採木定力議豫採探分夷險布恩信明賞罰使商夷樂趨操縱在手乃可集事當事悉從之又念收木留難豫請工部頒式於商人及木至皆中程吏不得要索所省無算蜀民賴以全活者眾旋督學福建錄蔡清陳貞晟後裔以示風向遷南僉都御史督操江疏言權使罔利藪姦已復上疏極言礦使之害累官南兵部侍郎卒贈尚書所學以求仁爲宗以與人爲善爲用眞修實詣超然自得仲兄定理字子庸隱居不仕兄弟相與講學不倦學者稱八先生羅近溪贊曰儒者之高蹈聖世之逸民理學宗

工其八先生乎

明史參葉向高撰本傳

彭台字公甫生四歲而孤穎異不羣讀書務根極理要反躬省證嘗爲尺籍記日履題曰天鑒在茲夢寐少離於道輒竟日不懌嘉靖己酉領鄉薦益孜孜以明道善俗爲己任卒年二十九祀鄉賢

吳心學字少虞家世業農一意孔孟之學隱似馬山中鑿山開徑倚石爲壁引水爲巢於絕頂兩巖間面柱靜坐久之訪學求友足跡幾徧天下收遺書數百卷歸教人以下學上達爲宗居山中凡二十年卒初入山鋤石得記云似馬山中出洞龍故學者以洞龍稱之

羅田縣

貴州府志

卷之十九

儒林

六

胡明庶字功甫嘉靖壬辰進士孝友力學尤精理數有蔡邵皇極律呂二書圖解行世弟明通明睿明書皆知名明通爲最著云明庶明睿俱祀鄉賢

胡明通嘉靖戊子舉於鄉學宗程朱嘗曰居敬窮理可到聖賢不必求新異也授信豐知縣振饑弭盜有功歷金華通判甫一月聞母墓圯遂告歸家居儉約如布素學者稱東郊先生著有征邁集

蕪州

韓萬鍾字天爵少貧寒嗜書史持守方正不失尺寸以歲貢爲休甯教諭擢潁州學正益以身範物究心天人之理著有皇極註解等書

顧問字子承少卽有志聖賢年十六偶疾父母以爲憂輒感疾易愈耳政恐以此廢學不至聖賢爲大罪可懼也嘉靖戊戌成進士除壽昌知縣俗好溺女下令嚴禁之徵爲侍御史遷浙江按察僉事蔬食澹泊人呼爲茹荼顧公隆慶中擢福建參政九疏乞歸講學不輟羅洪先嘗曰子承眞聖人之徒也年八十一卒與弟闕並祀鄉賢

案問字子承一字日巖生時母夢巖端日升大如車輪驚寤而目中猶睹光耀流燭上下以故字之云

三楚文獻錄

顧闕字子良方六歲頽焚祝天爲道德性命之學以報劬勞恩弱冠舉於鄉嘉靖庚戌成進士除刑部郎父母卒與其兄問同廬墓側服除補禮部郎移南京吏部稽勳司遷福建副使

年僅三十九決意告歸里居四十七年一日忽召子孫語曰昨夜夢一聯云津吏報增三尺水山人歸臥幾重雲今歲當大水吾將逝矣已而果然關治經尤精詩易學者稱桂巖先生子大訓詳文苑

廣濟縣

吳自守字介夫為諸生不得志潛心性理攜篋往匡廬山閉關研究三年有得尤邃於易蘄州顧問建讀易庵延之自是稱易庵先生從游者日眾設講堂泉湖側以待四方學者卒祀鄉賢王志注云舊志有吳一庵案自守號易庵縣志並無各一庵者訛易為一人兩見恐誤
韓紳字南皋諸生篤志好學從吳自守游而學稍異自守主宋儒持敬而紳直捷頓悟以陽明為歸入吳訪管東溟東溟主

張釋氏教典紳未肯服有往來論道書載東溟問辨論中性

至孝父母歿各廬墓三年致悲烏繞塋之異有集稿三卷未

行世祀鄉賢王志入孝義今依縣志移入

楊民服字信甫號任庵性孝友弟邁疾齋沐露禱嘗讓弟以廩

餼迫應貢則讓翟又讓趙曰翟以資淺趙以誑誤吾不讓二

人其遂已乎後以歲貢任吳縣訓導遷蔚州學正專心聖賢

以求放心尋本體為訓

胡篤生字孟培少篤學專心性命之旨時楊民服司訓吳縣從

管東溟游篤生亦往執贄焉東溟之門稱篤生暨楊民服韓

紳江夏段煥然為楚中四君子卒祀鄉賢

黃梅縣

瞿九思字睿夫十歲從父晟宦吉安事羅洪先十五作定志論
後從同郡耿定向游學益進舉萬曆癸酉鄉試居二年知縣
張維翰違制苛派民聚毆之維翰坐九思倡亂巡按御史向
程劾維翰激變吏部尚書張瀚言御史議非是九思遂長流
塞下子甲年十三爲書數千言歷抵公卿訟父冤甲弟罕亦
伏闕上書求宥屠隆作訟瞿生書徧告中外馮夢禎亦白於
楚中當事而張居正故才九思乃獲釋歸三十七年以撫按
疏薦授翰林待詔力辭不受詔有司歲給米六十石終其身
乃撰樂章及萬曆武功錄遺罕詣闕上之卒年七十一九思
學極奧博一時嗜古篤志之士鮮其儔崇祀鄉賢甲詳孝友
罕詳宦蹟明史文苑傳

周來蘇字子仁世居五祖白蓮峰之東自號蓮峰居士不喜制
舉業潛心理窟深得良知之旨耿定向定力皆心契之著述
甚富明季燬於兵卒後以郡守請立祠東山歲春秋上戊致
祭邑人石喬年爲之傳子詡雲詳孝友

國朝

黃岡縣

曹本榮字木欣號厚庵之建孫父大輔諸生以篤學稱本榮少
卽有志聖賢學行端粹順治己丑成進士選庶吉士初好王
守仁書及得館師胡此庵激發退而深思一年豁然有省遷
司業以正學爲六館倡順治九年應

詔上言其略云承二帝三王之統當以二帝三王之學爲學宜開

經筵討論經史以崇德廣業

報聞十二年

詔舉行日講擇滿漢詞臣七人充日講官本榮與馬累遷左庶子十

四年奉

敕與大學士傅以漸撰易經通註復纂修歷代通鑑累遷

國史院侍讀學士素善病

上遣良醫診視

御筆作畫親書丙申仲秋做宋僧巨然筆意賜之

上一日讀孟子人知之亦囂囂顧本榮曰自得無欲汝足當之其被

眷注如此康熙二年以病歸卒於揚州臨終沐浴正衣冠視

日方中危坐而逝學者稱為文靖先生所著有五大儒語要

居學錄格物致知說及古文輯略奏議稽詢數百卷子宜溥
字子仁由廕生舉博學鴻詞官檢討篤學勵節操著有鳳岡
詩集

案本榮同年漢陽譚鳳禎官大理評事卒於京邸貧無以
殮本榮為之治喪其妾生子令室中婢乳之魏象樞為賦
古人交行後遵化周體觀過漢陽有詩云漢陽得見譚公
子舉止恂恂文學深卻憶黃岡曹厚老果然不負託孤心
蓋紀實也

通志

陳大章字仲夔父肇昌督學廣東大章隨侍交梁佩蘭陳恭尹
獲講習之益工詩古文及官中書與都中諸名士唱酬故事
中書例得與春秋闈試康熙戊辰大章成進士引

見

上稔知其姓名以問閣臣特改庶吉士傳為館閣盛事大章性恬淡不趨榮利旋乞歸奉母孝養備至築室松湖鍵戶讀書究心天人之理學益純邃教子弟有家法置節孝祀田兼以贍族著有詩傳名物集覽玉照亭詩北山文鈔讀史隨筆抱節軒類記等書卒年六十九子師晉字道川貢生與漢陽彭湘懷同輯杜濬詩參先賢學行略

萬年茂字少懷號南泉曾祖爾昌祖為恪父紳祖數世清德語具各傳年茂生而清英年十四楚撫觀風取冠入郡巡撫王士俊尤器之目為鼎彝法物乾隆丙辰成進士入翰林澹於勢利一刺不投要津日與同志趙青黎蔡新輩以道義相切

劇時史館例進經議年茂指陳時事不避忌諱掌院鄂爾泰讓之弗為動辛酉典試山東壬戌會試同考稱得人梁國治劉墉其最著也擢御史遇事益敢言如請免蘇州米豆稅鬪毆未及丁請勿償皆議行越二年上疏劾于振陳邦彥其略曰廉恥為國維之大學士列清華之長本年八月二十八日
我

皇上賜宴臣工於瀛臺殊恩異數千載一時際此隆遇正當深自砥礪詎有侍講學士于振陳邦彥向侍郎傅恆越禮獻媚近前屈膝觀禮之場眾目驚駭請予罷斥俾知無禮之逐共敦羞惡之心奏入

上因其語稍戇抑之遂免歸迨修

高宗實錄

仁宗覽其疏命勿諱方年茂之未出都也兩月閒研玩周易作圖說

六卷發體用一源之旨揚名時見而歎曰歷聖心傳在是矣
歸里杜門謝軌樂志養親是時大吏慕其賢聘請主講歷麟
山涑水鷺洲豫章河東嶽麓江漢各書院學者咸尊仰之乾
隆五十七年重宴鹿鳴卒年九十子承宗詳文苑孫鼎恩詳
忠義鼎勳詳宦蹟

蘄水縣

徐子芳字茂孫諸生祖齡子也誕日家人聞墨香經宿不散幼
穎悟父愛之嘗語以古今人物學問源流及濂洛關閩之學
子芳甫七歲能誌之不忘及年十二遭親喪家既貧又值亂

離猶業學不輟是時陽明良知之說盛行子芳獨屹然不惑
研究經史性命之文思於古人正學有所發明潛心體驗至
忘寢食凡七載浩然有得每一論列古今必剖晰源委將以
措之行事惜未竟其用卒年八十三以歲貢終著有四書口
義壁經本義周禮參說左國詳解及爾雅補註離騷疏義等
書子乾文字公健學以主敬爲宗名其齋曰惕廬雲文字公
倬與兄乾文承父學一家相師友時有三徐之目孫明理詳
文苑

徐雲宏字元石年七歲卽知向學康熙乙卯拔貢戊午舉順天
鄉試授道州學正遷建昌知縣潔己愛民革除陋規邑中廢
里俱成村落時有視民如子恤士如珍之謠以父艱歸起白

河知縣卒於官大學士高安朱軾經紀其喪得所著書歎曰是合儒林循吏爲一人矣子守中由拔貢宰山右歸里無僮

石儲王志入宦蹟今依縣志移入

官純滋字秀士一字蘭九撫邦子康熙辛酉拔貢生幼即恥事帖括迺取古今典制因革暨名賢博議裁以己論爲書百卷名曰經世則後益研究經傳尤精詩易嘗游都門貴人聞其名欲納交輒自斂跡時論高之弟純佑同科拔貢爲文原本經史宏麗雅贍督學姚純燾嘗曰校楚之役利獲二雋未幾卒於京純滋子正德詳篤行

劉夢鵬字雲翼父文選爲諸生有聲督學張以優行舉夢鵬乾隆辛未進士授饒陽知縣饒故多姦猾夢鵬緝之力案無留

牘緩徭役免浮稅造士撫民循聲卓著以丁艱歸尋卒著有春秋義解屈子章句其論春秋大旨推本公穀謂公穀屬詞比事義不詭於儒者

麻城縣

袁銑字金溪嘉慶辛未進士由編修授御史晉禮科給事中侃直端重風采嶽嶽爲文必根柢經術少受業同里鮑鵬學以宋儒爲歸宿嘗巡通州漕務稽查豐裕倉屏絕餽遺巡視南城咸爲驄馬之避遇事敢言所陳皆關天下利病道光元年首上請停捐例一疏得

旨褒嘉又論科場積弊

報可

官廟有忠君愛國尹壯圖洪亮吉後僅見此人之諭然卒以言事去官疆吏雅重之延主講江漢書院教人以勘破義利關爲下手工夫學者翕然從之士風一變出其門者如喻懋泰王家璧彭久餘古韻梅見田陳堯松皆有聞於時其他成名以去者甚眾時同年友王贈芳督學楚中銑不令其子應試其方正如此著述多散逸僅存四書義蘊林則徐爲之序謂足以闡發聖言其行誼具王贈芳所爲傳後祀鄉賢

黃安縣

盧緯號雲浦爾悌子性穎敏事親孝康熙癸卯舉人授山陰知縣折獄多平反新陽明書院集邑子弟讀書其中值

聖祖南巡會稽縣闕未補緯一身兼任事無不辦會餘姚諸暨饑民

亂大吏擬捕剿緯乃單騎往諭輸金粟振之民遂安謐全活無算旋以病歸著有麟經要義五經精義及宜園集等書張希聖字亞石百程次子諸生品學純正知縣蕭恆聘之使其子師事焉希聖因徧讀廿一史研究經義學益粹會安陸有異鳥人面鳥身領下白髭長三尺眾莫識希聖曰明萬曆十五年此鳥見於秀水縣其年大水已而果驗羣歎其淹洽父沒泣血三年事母姚孝養備至季弟希天病親調湯藥嘗寓郡城有女奔焉立拒之其勵品若此年五十卒

羅田縣

秦之鐸字勝木九歲能文十二歲補諸生祖父文煒以學行受知楚撫延入幕課讀遭夏逢龍之亂沈於江父基諸生以哀

毀卒鐸孤貧事母至孝居恆苦志力學康熙己酉拔貢生肄業太學大司成以楚材目之歸益耽經史富於著述尤敦本勵行喜聞揚節孝學者稱楓廬先生

蕪州

盧紘字元度號澹崖如鼎子順治己丑進士授新泰知縣晉桂林同知歷任蘇松糧儲長蘆鹽運使多惠政性好學雖簿書旁午不廢蒐討而操槩懷鉛未嘗少輟州志出其手筆爲錢謙益所激賞比之申叔左史云

王志入宦蹟今依州志移入

案紘官新泰時值海寇倣擾紘躬宿譙樓兩閱月一夜南城邏卒見所執槍頭火起如列炬一軍譁然以爲不祥紘往覘之曰虜破有日矣問故紘曰昔車師後王姑句家矛

端出火其妻股紫陬曰此兵氣也利用殺敵又晉惠帝永興元年成都王伐長沙每夜戟鋒有光如懸燭以此卜之勝氣在我無疑矣未幾海寇果授首

參錢益撰本傳

廣濟縣

李奇觀字巨海孝友質行鄉人化之少時與金之純同學研求濂洛大旨以力行爲歸當明末寇亂里中立守望保障眾推李公長者主其事事平家居授徒多所造就姪必泰甥金德崇德嘉皆出其門卒祀鄉賢

陶起庠字謹之乾隆己亥舉人安陸教諭父大眉曾任是職議建節孝祠未果因卒成之教士多所成就致仕歸十餘年卒起庠性純篤事親以孝聞終身孺慕不衰與人接皆矢以誠

嘗病學者徒務記覽爲辭章不明正學乃取四子書研精提
要著四書集說其書一以朱子爲宗於漢唐諸儒之說抉擇
精審誠有裨於後學

黃梅縣

石喬年字僊尹礪子諸生石氏自崑玉中丞不阿宰輔直節震
天下一再傳並以忠孝著喬年少卽敦氣誼崇名教不治帖
括家言寂處湖濱杜門著述皆能明道見志判別人禽義利
之界極精時徵博學鴻詞楚使者薦舉喬年辭不赴黃利通
爲立傳

補遺

明

麻城縣

鄧光舒字葆之萬曆丙午舉人授浮光廣文歷陟廷評寺正守
廣南致仕留心性命之學嘗曰心爲主則諸物爲奴視黃金
爲瓦礫不難也幼常爲後於伯父伯父舉子甫三歲而沒光
舒撫循教訓旣長舉遺產悉授之歸本生父

蘇志
補錄

此傳王志未載
茲從康熙乙丑

文苑

宋

黃岡縣

潘大臨字邠老性警敏不羈以詩名於時與蘇軾黃庭堅張耒
洪芻徐俯輩游庭堅稱為天下奇才臨川謝無逸嘗問有何
新作答云秋來景物件件是佳句恨為俗氛蔽翳昨有詩云
滿城風雨近重陽忽催租人至遂敗意止此一句奉寄聞者
賞之年未五十卒著有柯山集祀鄉賢弟大觀亦能詩名與
兄埒

何頴之字斯舉篤學善屬文自號樗叟蘇軾謫黃建雪堂頴之
作上梁文為時所稱有黃州雜詠詩陸游讀而和之黃庭堅

黃州府志卷之十九

宿黃州觀音院鐘樓有詩云鐘鳴山川曉露下星斗溼老夫

梳白頭潘何墳篋集謂大臨及頡之也

孫賁字公素為韓魏公琦書記琦知之深後官奉議郎蘇軾嘗

與之摹魏公詩勒石

蕪州

夏倪字均父自府曹左官祁陽監酒文詞富贍儕輩罕及著有

遠游堂集補錄通志

黃梅縣

王仲瑄性敏慧善綴文崇甯閒進士官翰林學士

元

黃岡縣

滕賓字玉霄至大閒為翰林學士有文名嘗作韻府羣玉序卒

祀鄉賢

明

黃岡縣

潘子安由薦舉任四川夔州府同知工詩賦著有海天清嘯集

王廷陳字稗欽父濟吏部郎中廷陳穎慧絕人幼好弄父扶之

輒大呼曰大人奈何虐天下名士正德丁丑成進士選庶吉

士益恃才放恣故事兩學士為館師體嚴重廷陳伺其退食

獨上樹杪大聲叫呼兩學士無如之何佯弗聞也武宗下詔

南巡與同館舒芬等七人將疏諫館師石瑄力止之廷陳賦

烏母謠大書於壁以刺瑄及執政皆不悅已而疏上帝怒罰

黃州府志卷之十九

文苑

十八

跪五日杖於廷時已改吏科給事中乃出爲裕州知州廷陳不習爲吏又失職怨望簿牒堆案漫不省視夏日裸跣坐堂皇見飛鳥集庭樹輒止訟者取彈彈之上官行部不出迎已而布政使陳鳳梧及巡按御史喻茂堅先後至廷陳以鳳梧座主特出迓鳳梧好謂曰子候我固善御史卽來候之當倍謹廷陳許諾及茂堅至銜其素驕蹇有意裁抑之以小過榜州吏廷陳爲跪請茂堅故益甚廷陳大罵曰陳公誤我直上堂搏茂堅悉呼吏卒出鎖其門禁絕供億且將具奏茂堅大窘鳳梧爲解乃夜馳去尋上疏劾之適裕人被案者逸出奏廷陳不法事收捕繫獄削籍歸世宗踐阼前直諫被謫者悉復官獨廷陳以呈吏議不與屏居二十餘年嗜酒縱倡樂益

自放廢士大夫造謁多蓬髮赤足不具賓主禮時衣紅紫窄袖衫騎牛跨馬嘯歌田野閒嘉靖十八年詔修承天大志巡撫顧璘以廷陳及顏木王格薦書成不稱旨賜銀幣而已廷陳才高詩文重當世一時文人才士鮮能過之著有夢澤集

卒祀鄉賢

明史文苑傳

王追美字輝之廷儒孫七歲舉郡神童郡守疑其妄試之應聲而就乃大驚補諸生授羅圖籍恣力爲詩古文嘉靖辛酉舉於鄉放情山水詩酒自娛著有岫嶠山人集子一鳴自有傳呂禱字本善總角作烈女旨酒二賦奇字盈幅時人莫識也王廷陳見而奇之呼爲國器嘉靖辛卯舉人授丹棱知縣性簡靜吏事清飭暇卽吟詠不輟楊慎爲序其蜀稿年九十卒著

有見一山人集子應端諸生以博學稱孫元音自有傳

王一鳴字伯固追美子七歲郡舉神童登萬曆丙戌進士與同年謁政府王錫爵獨揖之曰子天下才也會修國史大學士趙志臬薦有詔徵用未上而史局罷授太湖知縣發廩煮粥修築隄堰民賴以蘇居四載移任臨漳兩臺潘臬使者有撰著悉屬焉卒於官著有朱陵洞稿祀鄉賢子封東諸生善書法

秦繼宗字西汀萬曆甲午舉鄉試第一授饒陽教諭庚戌成進士累官戶部郎中爲人德性純厚力學不懈經其指授者皆有成就著有尙書彙解禮記疏意行於世

呂元音字節之禧孫髮甫燥以文名比長學益博知縣茅瑞徵

修輯縣志舉屬裁定論者多稱之天啟辛酉以拔貢舉於鄉未仕卒從孫德之字時素歲貢生亦有文學嘗輯黃岡續志數卷考校古蹟頗多詳核云

王同軌字行甫高才博學以貢爲南太僕寺主簿興國吳國倫雅重之同呂元音修輯縣志稱善本著耳談二十四卷備載明代嘉言懿行及幽隱神怪之事子追醇有才名著有漁唱笞管文通明詩初選等集同時有汪世楨何譔宋家瑚方日旭亦以博奧聞

孫應鴻字茂長諸生少勤學淹貫經史百家案積萬卷信手拈取無不習熟書法亦工妙與黃梅瞿九思善九思所訂六經皆資折衷尤精易傳著有河洛理數詮等書子錫蕃詳宦蹟

黃州府志 卷之十九
鄭先慶字亦懷明末諸生博學多才放情塵表于清端成龍所稱肯巖老人也嘗爲跋漁舟詩又序其集而刊之欲使讀書談道者知江漢間有張子同陸鴻漸其人也卒後金德嘉爲表其墓子昱詳宦蹟

蘄水縣

郭文輔字良弼少貧父使牧牛輔挾筆硯及獨足几就巖間註周易宏治甲子舉於鄉官鹽課提舉著清聲解官歸家忽火文輔籲天曰有不義物願焚之火遽滅嘗曝日中草做履督稅吏執之尋知爲文輔甚懼文輔曰汝非知我笑而遣之朱期至字子德軫子萬厯甲戌進士與江夏蕭良有京山李維楨俱以佳公子登上第出爲懷慶知府志意廓如以清靜爲

治興蘇州山人胡之驥善卒後之驥詮次遺稿名王屋山人集弟期昌字辰翁萬厯庚戌進士常州知府蚤歲以文學顯名爲楚十二子之一卒祀鄉賢

周光德字翼明萬厯壬午舉人授渠縣知縣值旱雹光德設壇禱禳有麥秀岐穗之瑞是歲不爲災聞親病乞歸養博綜羣籍凡天文地理兵屯法律之屬莫不研究著有太極圖說卦傳衍義諸書卒祀鄉賢子健行字弦玉歲貢生父喪廬殯所殯側有古松枯榦復生智井冬溢人以爲孝感生平博學工古文詞孫壽明進士臨海知縣明亡以遺逸終傳詳宦蹟

郭士望字應璜舉萬厯癸卯鄉試第一甲辰成進士遷考功員外郎典試山西歷官福建按察使才長學富爲文瑰璋奇麗

卒祀鄉賢

黃正色字美中可久子崇禎丙子舉人授蕪湖知縣有冰檠操不可干以私未幾乞歸蒔屋數間圖書滿前探討無虛日善書人有得其片楮者皆寶之著有黃氏文統畏合堂稿

金甌字卜公玉節子少孤事母以孝聞與黃正色王一翥劉侗輩以文章道義相期許崇禎壬午舉於鄉值寇亂道梗未上禮部試明年城陷病沒年五十一子思默諸生工詩古文一時名公雅重之

徐宗齡字商賢諸生弟祖齡字周史廩生少孤奉母林教立志奮發稍長並有名於時與曹允昌黃正色以詩文相摩切祖齡感慨時事所抱尤偉是時楚中破敗巡撫何騰蛟江防道

許文岐就大學士姚明恭所籌畫恆延祖齡抵掌其間多忠謀讜論惜不能用祖齡子子芳詳儒林

麻城縣

梁宸字西橋少穎悟嘗館沔陽編修童承敘家童偶閱漢書有遺失宸悉記誦無訛弱冠食餼三讓貢於年長者卒就教職與許吏部善臨選許令自擇宸曰有命乃簽成都許爲悵惘又欲致其子補廩餼辭曰年少當力學功名易得亦易失也熊吉字子敬經孫以歲貢官南陵訓導課士有方督修城池收瘞暴骨縣人德之陞璧山教諭不赴解組歸與毛鳳起劉承烈等講學邑中著有柏舉文集麻城志略等書

鄧楚望字震卿達孫嘉靖己未進士歷禮科給事中伉直敢言

後以言事忤旨出爲順德知府旋轉浙江觀察使致政歸築
百可園優游林泉日以賞花賦詩爲樂著有詩刪續稿

邱齊雲字謙之嘉靖乙丑進士授富順知縣陞戶部郎出爲湖
州知府致仕歸年未四十宦情甚淡惟寄興詩酒耽懷游覽
著有吾兼亭集粵中稿國雅中選集等書子坦字長孺萬曆
丙午武舉官至海州參將旋棄官歸與梅之煥李長庚劉侗
時相唱和著有南北游草楚邱集度遼集諸稿

王兆雲號赤岡博學家多書築垂雲樓藏之交遊悉江左名士
著有王氏青箱錄明詞林人物考等書子陞號西陽工書

魯晟號秋崖之賢子晟貢生博學瑰行爲邑名士閩人吳與泌
爲立秋崖逸老傳所著詩文極富散軼殆盡今惟爲邑人周

禮作蝶園詩草序尙存

劉侗字同人爲諸生有名受知督學葛寅亮禮部以文奇奏劾
侗與景陵譚元春黃岡何閔中降等自是名益著初游京師
與同里周損著帝京景物略所爲詩文皆幽古奇奧無一字
拾人殘瀋崇禎甲戌成進士之吳縣任卒於維揚舟次侗以
千秋自命不苟同於世惜未竟其用時有周世遴字伯譽妙
齡雋才並見賞於葛學使早卒有文稿傳世陳際泰序之

曹允昌字石霞崇禎己卯舉鄉試第一癸未成進士喜讀書不
任吏事授嘉定知縣棄歸奔父喪於永昌時黃岡何閔中客
死於滇允昌並挈其櫬歸至昆明昌以哀毀卒家人欲置何
一柩屢昇昌柩不起其弟允明祝曰得勿爲何先生乎今當偕

行耳乃發昌與何並未一面聞者益歎其義所著詩文雄奇
偉岸人爭誦之

案允昌由知縣左遷福建照磨轉入雲南順治八年潛歸
里內院洪承疇檄致軍中允昌佯狂謾語醉吐污洪茵又
以詩誚之遂遣歸見白茆堂文集

黃安縣

盧大儒原籍麻城居中和河東學者稱東河先生嘉靖丁酉副
榜歷浮光唐縣兩學教諭陞鳳陽府通判少讀書日可盈寸
稍長博極羣書尤精胡氏春秋子孫遂世其學焉子廷篪詳
孝友孫堯臣詳宦蹟

王心正字定宇萬曆己卯舉人黃安設縣以來舉於鄉者自心

正始嘗應雲南鄉試同考聘得士六人多捷進士人稱冰鑑
後歷官嘉興通判有清操

耿汝愚字克明定向長子年十七游庠兩舉副貢生嚴毅狷介
時俗敬憚博通經籍於字學尤精著有韻會類編從弟汝恣
字克勵定力子聰穎好學寓目不忘萬曆乙卯舉人與焦竑
艾南英論文賦詩無意仕進

吳光龍字荀長化子十歲能文十八為學使董其昌所賞識旋
舉拔貢生廷試第一文譽日隆與邑人秦如容共捐貲建置
會館及授廬江知縣循聲楸著僅八月告歸宦橐蕭然善古
近體詩工書法尤喜作徑尺大字凡商周彝鼎晉唐書畫鑒
別真贗不差累黍一時推為風雅之宗年七十九卒

吳采字君素年十二補諸生學使葛寅亮董其昌皆奇賞之長益博學強記廿一史中輿地爵秩過目不忘書法得眉山之奧以歲貢官通山教諭尋擢成都通判道梗不能赴遂歸

羅田縣

蔡惟忠博覽羣書尤精究於五子暨真氏蘇氏書由歲貢授滄溪訓導以建城功陞知縣致仕歸

朱正振字敘九廩生明季寇亂廬舍盡焚父爾且避兵猶袖書督課遂博通羣籍工詩古文詞著有亦山詩草

蘄州

甘瑩字德輝成化戊子舉於鄉授福甯知州抵任數日卒生平尚氣節能詩尤長於樂府祀鄉賢

華巒字伯瞻仲賢子幼負雋才弱冠舉成化丙午鄉試第一丁未成進士授編修性凝重文詞清麗館閣推重之尋卒李東陽誌其墓祀鄉賢

郭承恩字惺寔性靜無他嗜精研經史及先天理數之學由歲貢累官什邡知縣冰檠自矢暇與諸生講論學術鄰封多負笈至者告歸著作甚富卒年八十九祀鄉賢孫從詳藝術王儼字望之正德庚午舉於鄉累官思恩知府吏民懷之生平能文章好著述致仕後與郝守正修蘄志十二卷以高簡稱守正字中夫嘉靖癸未進士累官懷慶知府告歸與儼游一時碑版文字多出其手

陳仁近字元復博學好古寒暑一鏡不輟嘉靖庚子舉於鄉官

眉州知州告歸著有春秋一是應叩鳴諸集顧問評其書曰大雅之音鬱乎沈沈難諧俗心

李時珍字東璧號瀕湖言聞子諸生生時有紫芝生庭白鹿入室之異精岐黃術官楚王奉祠正王薦於朝授太醫院判時珍學問該洽著述甚富其本草綱目一書窮搜博採芟繁補闕歷三十年閱書八百餘種稿凡三易而成卒後子建元上之朝敕禮部刊行王世貞董其昌為之序崇祀鄉賢子建中詳宦蹟建木詳篤行參明史本傳

顧大訓字德蒙闕子歲貢生授南昌府通判少折節讀書藏書五萬餘卷手錄千餘卷書法精嚴無一字誤著有續高士傳八卷雜文詩詞八卷子天錫自有傳顧氏家傳

顧天錫字重光天啟歲貢生博通經史受知於督學董其昌入北雍對策語及闍寺主司乙之尋選中牟知縣不就嘗講學海淀天津歸陳先世遺書教子景星名重海內著有易林說史評顧氏蘄州志及石室集詩文景星詳隱逸

袁素亮字公寥世振子歲貢生少磊砢不羈詩古文詞援筆數千言時錢謙益譚元春常相唱和與同郡王一鶴吳亮思曹大聲易道暹馮雲路汪陞延詹謹之劉侗俱有名復社值寇亂不屈死詩文多散佚

廣濟縣

寇學海字巨源博學工詩嘗獨往廬山白鹿洞鍵戶數年取魏晉盛唐諸詩冥會之大有所得已而歸里名滿公卿閒時稱

寇山人晉慶成王願交驪山人辭不見使者三至乃往王延
入南嚮坐敬禮殊於他客由是山人名益高所至輒傾倒轍
迹且半天下顧性任俠不羈囊中裝隨手散去倦游歸徒四
壁立諸名士過從累日夜不絕其卒也停厝淺土萬曆中知
縣桐城劉允昌始遷葬於縣東郭畢四嶺伐石表墓並刊其
二餘齋遺集王志入隱逸今
依縣志移入
劉養微字敬伯賓子諸生家貧工吟詠自號康谷子詩宗何李
而稍自放逸黃岡何讓何謙兄弟皆博學與養微交最深歲
時通有無均休戚如同氣然養微以苦吟卒讓弟兄不遠三
百里賻其喪並爲刊其詩集弟養吉詳孝友
張皆然字匪譽其先世子龍太守以詩雄江漢閒皆然業尤力

爲諸生亦顯名嘗遊京師交遊多海內賢俊歸治圃於月塘
讀書其中著有兩易子集

饒嘉元字鈍庵之初孫年十二冠童子軍初爲詩不善劉養微
目攝之遂止不爲乃讀書大藏寺徧覽古今詩卒與養微齊
名中天啟辛酉鄉試典試者爲江陰繆昌期得嘉元文大賞
契後繆及於難哭泣成疾死著有夢謝堂詩草弟嘉繩亦能
詩從子來中字厥修學問該洽詩名震一時崇禎己卯舉於
鄉國變後不上公車著有晚照堂集

楊大鼇字用極萬曆庚子舉人上禮部不第游南雍南雍諸生
千餘人盡識之歸囊竭舟過彭澤適其父故人爲邑宰邀之
竟挂帆而去年三十卒知縣劉允昌刻其集子晉字子馬諸

生能繼父業

吳亮思字幼睿崇禎歲貢生少從劉養微爲詩有聲巒序錢塘
葛寅亮督楚學覽其文激賞之由是與同郡何閔中樊維城
黃正色王一翥齊名十三年有詔按才禮部尙書林欲楫耳
其名以應選爲權貴所擯放歸子敏權有文名

劉子杜字幼陵年十二爲諸生好學負經世志詩文皆有聲明
季亂撫時自傷故名字皆用杜少陵詩名浣花溪寄意也年
二十六卒妻王氏守節遺孤王乘舒峻極以女字之後爲諸
生有文名孫三本烜歲貢咸甯訓導本烜諸生本焯國學生
俱克紹家學本焯博覽羣籍著作尤富

黃梅縣

胡宦字仰成諸生學問閎博文不屬草頃刻盈數紙出入經史
學者稱南邨先生同邑瞿星字景星舉嘉靖癸卯鄉試文詞
與宦齊名

程夢麟字子瑞萬曆歲貢生幼英敏應試立成數藝督學姚奇
之謂孺子其宿構耶對曰左思一紀公權七步才遲速皆天
也遂入郡庠後選四川推官不就嘗纂修邑志復與修省志
著有麟經語錄忠孝通考等書

吳宗吉聰穎嗜學工詩文築梅山精舍日以著述爲樂後膺薦
辟授英山知縣卒祀鄉賢

洪度字公度崇禎歲貢生工詩文兼善篆隸嘗從汪侍郎可受
於黃連洲別業適洪濤浮敝篋至發之乃宋僧道肯集篆金

剛經三十二分字多磨滅度精思七晝夜重臨刊布董元宰
何象岡諸公釋以小楷摹勒上石藏都門摩訶庵明季城陷
被執不屈死子鳴夏諸生有父風

國朝

黃岡縣

劉子壯字克猷一字稚川髫齡穎慧屬文卽驚其耆長弱冠舉
於鄉順治己丑

賜進士第一人授修撰制策條奏如開

經筵立滿學教習及屯衛諸大政皆蒙次第舉行垂爲令甲壬辰
充會試同考所拔多知名士尋告歸蕭然如布素性孝友九
歲失恃每念母輒爲孺子泣遂以祀思名其堂嘗過吳門有

小吏被誣繫獄白於令脫之吏鬻女得金以獻子壯急贖還
之官翰林時捐金贖同鄉難婦俾得完聚他篤行多類此少
讀書舉洲文昌閣省身維謹旦晝所爲夜必焚香以告天平
生覃精論著所作制藝經術爛然雄深古厚陵轍一時與漢
陽熊伯龍齊名至今學者奉爲著蔡卒年四十四祀鄉賢著
有祀思堂詩文集行於世

參先賢
學行略

高思忠字孝移順治辛卯副榜少穎異每試冠軍督學高世泰
奇其才招同修三楚文獻錄後以康熙戊午歲薦授遠安教
諭以疾未赴任

高登雲字丹壑順治辛卯拔貢授嘉興知縣有惠政晚告歸與
奚祿詒同修郡志謹嚴雅潔有陳承祚遺風杜濬嘗爲序其

詩稿所著有羣書納四卷續羣書納四卷

參楚詩紀

汪煉南字治夫世極子順治壬辰進士選庶吉士授編修值楚省大祲倡請蠲賑辛丑督順天學癸卯庚戌鄉會兩元皆其所拔士甲辰考最晉侍讀學士以疾歸卒於舟次

朱日濬字菊廬好學博文端方自守順治歲貢生均州訓導講說經義後進以為典型著有五經門句解百餘卷黃州文獻錄六卷門人王材任梓行之

王澤宏字涓來用予子順治乙未進士選庶吉士累官禮部尚書立朝持大體御史某疏請流人宜徙烏喇澤宏不可事得寢又嘗上疏請移湖口關還九江商民便之為建生祠

聖祖仁皇帝先後賜以夙夜惟寅及尊道堂匾額尤工詩著有鶴嶺

山人詩集福清魏憲稱其五古則鄴下彭澤七古則浣花徠近體則絳州鹿門飄飄乎如蟬蛻之遇秋風冷然善矣子材升貢生能詩材任自有傳

王封濬字五書順治戊戌進士選庶吉士時年甫十八居官廉慎康熙間

御書尊德堂額賜之累官禮部左侍郎年六十餘卒於官賜祭葬著有蒙春園詩集子如稱諸生亦能詩

王追騏字雪洲同觀子順治己亥進士選庶吉士改給事中多所建白以乞養歸閉戶窮經者二十年時以博學鴻詞徵不就晚好易象懸河洛圖於座朝夕省覽著有居俟樓集樊維域字念庵玉衢子少失怙事母以孝聞順治己亥進士教

授德安課士以孝弟廉隅爲本遷平鄉知縣以廉能稱因母老乞歸卒祀鄉賢子齊伊舉人官中書齊英諸生孝友文學鄉評重之

奚祿詒字克生順治己亥進士博覽羣籍爲文力摹西漢累官常州府同知有清名歸無長物嘗修黃州府志文筆簡潔著有知津堂集

葉封字井叔先世嘉興人父長青明末官黃州衛經歷攝黃陂令賊至殉節死封占籍馬後徙居黃岡樊湖讀書養母順治己亥成進士除延平推官改登封知縣復嵩陽書院側有宋崇福宮故址稽史得司馬文正公以下曾以宰執領宮使者十有二人祀以祠置祀產焉旋遷西城兵馬司指揮封少

負英姿學詩於外舅杜濬在京師與宋犖王又旦曹貞吉顏光敏田雯謝重輝丁焯曹禾汪懋麟稱十子王士禛定其詩合刻之士禛最賞其嵩山諸詩謂當專集單行毛際可亦稱其嵩游草可與施閏章中岳少室詩相伯仲嗣又以所作己庚詩郢中懷古詩寄士禛論次風格益高兼精爾雅說文訓尤工篆隸後以博學鴻詞薦遷工部主事未上而卒著有慕廬集嵩山志嵩陽石刻記

參先賢學行略

案封居樊湖同邑王澤宏以翰林里居月夜汎舟湖上聞書聲出菰蒲中先悲婉而後怡悅如懶瓚之在衡山者曰此必井叔也迹之果然

先賢學行略

周世甦字甯質號丹崖以歲貢官瀘溪訓導詩文皆淹雅可誦

居雅淡洲與劉子壯曹剛來友善嘗爲祀思堂集作敘所著
有丹崖詩文集二卷尙存

鄒互初字公窳與操之盛同學爲諸生皆有聲一日互初講學
之盛聆之瞿然若失遂北面執弟子禮時以爲難互初文本
經術教人以德行爲先之盛字右恆文詞雄偉康熙癸卯舉
人天門教諭爲理欲消長榮枯循環二圖說令學者省察晚
歸與互初修葺問津書院以啟後學互初子江遐諸生孫士
通舉人通城教諭之盛子士望貢生皆能傳其學

胡思樊字樊川康熙丙午舉人鄖陽教授風流文采照耀一時
卒於任著有樊川詩集

欽士佃字文思康熙癸酉舉鄉試第一庚辰成進士官翰林少

孤家貧汲水拾薪事母以孝聞性澹泊臨事不苟工詩古文
學院韓菼極推重之謂爲尹師魯梅聖俞之亞著有瀛洲集
程芳烈字子揚少爲文敏而有法康熙己酉副榜嘗環屋種松
千株號半山莊讀書其中不關世務後選竹山教諭不就子
之駟 恩貢生善書孫後濂自有傳

詹大衢字麗朋謹之子康熙壬子副榜翰林院孔目居母喪有
白燕來巢之異穎敏力學寒暑不輟著有大易疏晦於朱子
本義大有發明兄大衢貢生黃陂教諭子士朗貢生嘉魚訓
導從子士懿戊午舉人漢陽教授一門俱有文學

靖乃勳字敬庵諸生好讀書尤精三禮之學受知於蔣學使永
修性慷慨有經濟才康熙十三年山寇蠢動知府于成龍討

平之勲贊畫之功居多縣有蠹胥飛灑無徵錢糧於其族族人莫辨勲取冊一覽卽燭其弊其才識多類此子道謨自有傳

陳芳烈字仲紀康熙歲貢生好古勤學博極羣書尤潛心易理爲文雄博浩衍著有觀心堂集

胡之太字康臣讀書目數行下九歲失怙恃依叔氏自給奉事無異所生康熙戊午舉人授長沙教諭先行誼後文藝學者宗之擢涑水知縣以老病謝歸之太夙擅才名甲子與修通志年九十卒著有萃古名言及卦餘集

王材任字擔人澤宏仲子康熙己未成進士澤宏方官翰林學士材任不肯留京師曰吾將歸而肆力於學歷官僉都御史

持法平允糾劾不避權貴著望雲白沙及集唐和蘇諸集純曰尊道堂詩鈔先是澤宏領袖詞林風流文采傾倒一時所著詩安和醇雅有燕許臺閣氣象及其投老江南屹屹風雅遠近奉爲總持材任饒有父風尤工七律集句幾於無縫天衣歸田後住常熟虞山之西礪故號西礪泊長洲沈德潛稱詩吳下材任歸然魯殿靈光猶與同人唱和險韻成集想見此老據鞍矍鑠興不淺也

參先賢學行略

案材任歸田後沈德潛於歲正八日因招飲賦贈云接引詞流老愈謙山莊留客夜耿耿酒懷還逐風情好詩律眞同將令巖屋角一枝梅破萼天邊半鏡月窺簾閒身正許關農事穀日欣聞大有占雲山高臥是君恩往事追思

歲月奔虎尾履餘猶有悸衣衣補就略無痕青尊紅燭人
逾健花史茶經客共論相約鏗鏘押強韻雪車冰柱集韓

門歸愚全集

宋如辰字斗凝康熙甲子舉鄉試第一乙丑成進士選庶吉士
澹泊自守朝會供直外閉戶著書炊煙常絕泊如也歷春坊
中允致仕歸教授自給家居三十年邑令罕見其面弟敏道
字白山壬午舉人工詩古文孫本敬詳宦蹟

陳大華字西嶽肇昌子年十四與諸文士泛舟鸚鵡洲賦詩曰
漢祚日已非志士憤不已褊心固其常英氣亦何偉不見大
小兒捐生同一理長嘯俯大江日暮酸風起諸文士為之閣
筆年二十二舉康熙庚午鄉試第一手撰錄經史成帙書法

雋逸道麗卒年三十二著有石髓集詩六卷書法緒言十卷

嗣子師棻舉人德平知縣修築隄堰捐置義田義冢義學士
民賴之著有敬義堂集

張光璧字斗符諸生父本忠廬父墓側賊至將掘其墓冒死捍
護賊釋之順治甲午舉於鄉官江陵教諭光璧博綜羣籍七
歲善屬文十八應郡試作涵輝樓賦文不加點知府何應珏
大加稱賞嘗以郡志多所闕誤殫心補輯成郡志注遺五卷
事繼母馮曲盡孝養馮沒哀毀成疾卒子亮采有學行蚤卒
士林惜之孫念祖自有傳

萬燦字季方爾昇子康熙癸酉舉於鄉同舉者為袁豐欽士佃
丁光偉皆有名文場而燦尤藉甚官歸州學正文章法度一

變舊習人比之子厚之在柳州焉以母老假歸母沒哀毀骨立旋卒子娛祖歲貢壽祖舉人咸能傳其家學

陳大慶字頤伯於書無所不閱一覽不忘能詩尤工樂府康熙丙子舉於鄉除桐鄉知縣有惠政解組歸家徒四壁而豁達自如人服其高致著有樂府及古近體詩四卷

張楠字耕石康熙辛卯舉人好古博涉過目即能成誦為詩刻削清麗敏捷過人嘗和友人百韻詩援筆疾書名噪一時晚授衡陽教諭詩多散失

王楸績字乃言父漢澳早卒家貧母余氏年二十一苦節育之楸績勤學好古為諸生有聲康熙乙未成進士除永州教授主講嶽麓書院雍正四年與修省志以疾告歸子光珮進士

歷官通渭登封知縣廉介嚴明士民稱之

吳純德字以占諸生潔己好修讀書不事章句務得其要領著有古文纂略諸書

靖道謨字誠合號果園乃勦子才識英練學求實用以文學顯楚中康熙辛丑進士選庶吉士雍正元年官雲南姚州知州下車訪求民間疾苦除陋規清積案獄訟寢少以病乞歸歷主鼇山白鹿江漢書院先是關中名儒王心敬講學江漢海內所稱豐川先生者也道謨往受學焉復游於楊文定名時之門由是學益純粹嘗修雲南貴州兩省通志 四庫全書提要謂其刪訂釐正條理分明乾隆十四年修黃州府志義例簡潔迄今賴是書以為援據乾隆元年豫督王士俊薦舉

博學鴻詞十五年楚撫唐綏祖復以經學舉皆不赴家居孝友建祠宇置義田六百餘畝以贍族人又倣朱子社倉法儲穀備荒凡積累四十餘年而後成鄉故多水為築隄障之數十村得免水害年八十四卒孫本詡舉人有學行安陸教授朱案扶字典傳雍正癸卯舉於鄉教諭南漳振興文教與修安陸襄陽鄖陽府志以艱歸哀毀踰常性廉慎樂施勸善至老不懈乾隆戊辰成進士未仕卒

孫偉略字頤園雍正癸卯拔貢潛心理窟以程朱為宗卒年八十餘著有四書參訂語錄十三經原委等書

王道明字雙崎少孤貧母陳夜難柴以供讀道明奉母訓益發憤通經史諸子為文工鋪陳排比似陸宣公奏疏以雍正癸

卯歲貢授武昌府訓導當道重其學行延掌勺庭江漢兩書院貢生主講江漢者金壇王汝驥外惟道明而已卒年九十六著有雙崎詩文集孫士珍詳宦蹟

周祚縉字次紳雍正丁未進士官施南教授少英敏年十六補弟子員家貧力學博稽羣籍搜奧探奇為文高簡澹遠有涵齋文集行世

王如琰字二思父封權諸生純孝篤學如琰雍正五年舉賢良方正授監利教諭培植士類人咸感之卒祀名宦生平力學勵品性傲岸寡言笑嘗與江陵張旋均選楚北詩佩行於世時同舉者邱良驥字渭牧家貧力學敦行誼官通城教諭程後濂字貢書芳烈孫乾隆丙辰進士事大父及父母朝夕服

侍躬滌污穢家有薄產舉以讓弟生平篤志力學嘗以博學鴻詞舉未赴河東總督白鍾山奇其才辟署海贛同知尋以父病乞歸著有治河末議

周茂建字展野世達子通經博學文章卓然成家游江漢書院夏太史力恕目為畏友不以儕弟子列乾隆丙辰舉於鄉任石首教諭

萬岳字三峰乾隆庚子舉鄉試第一事親以孝稱敦行誼博通經史初選來鳳訓導母老乞養服闋授宜城教諭訓士以崇實為先旋引退著有二餘隨筆一百二十卷年九十童顏兒齒望之若仙

宋鏊字慎三如辰從子誠篤好學有文名乾隆辛酉舉人壬戌

登明通榜官恩施教諭創修施南府志丁丑成進士任安陸教授以誘掖後進為務多所成就著有四書分辨詳解子治咸自有傳

張念祖字緒茲乾隆辛巳進士藏書萬卷手丹黃甲乙皆徧自四書九經及史記爾雅文獻通考皆有纂釋約百卷又有可齋詩文集三十餘卷少孤事母孝母病篤夢神授以鍼法依用之遂瘳從兄某析產蕩盡念祖迎之歸復均田宅需次銓部未選卒

邱士麟良驥子乾隆庚子舉人博學強識習春秋左氏於劉鄭賈服之學多所發明同里萬希槐淹貫經史儕輩中無足當其意者獨與士麟善每共談論輒歎服

王鑾字伯聲號徒洲髫齡出語輒驚人年十四入庠游江漢書院巡撫梁國治山長張曾做皆奇之爲文高古閱深時以方邑先輩王廷陳中乾隆丙午副榜遠遊粵黔放情嘯詠歸徙居邑東古高士莊自題其閭且作墓表年六十餘卒子源峨能詩門人王鶴嘉慶戊寅舉人亦辯博能屬文

李鈞簡字秉和號小松長青子乾隆丙午鄉試第一己酉進士幼端敏三歲侍大母膳置膝上匙箸或參差輒取正大母奇之五歲解賦詩及釋褐授編修嘉慶己未分校禮闈庚申典江西試復視學江西擢內閣學士三執文衡得人最盛盧坤鮑桂星白鎔花杰皆出其門先是鈞簡入詞垣有權要聞其才欲羅致門下鈞簡不與通故蔽之十載其人敗乃歷官工

兵吏三部侍郎十年

聖駕東巡獻一東全韻九言詩

賞蟒袍一襲十四年出督倉場請復通倉舊制開溫榆上流皆得旨施行至今稱便會因事鐫級補侍讀起順天府尹尋以編修致仕

鈞簡生有至性事父母極孝文詞雅健晚更沖和著有周易

引經通釋融齋日錄

萬希槐字蔚亭嘉慶歲貢生九歲能屬文博通經史百家言經指授者多所成就聞藏書家不遠數百里走致之著有困學紀聞集證錢塘陳嵩慶蘄州陳詩序之謂爲王氏之功臣閭何之諍友後爲南漳訓導

宋治咸字小阮鑿子嘉慶辛酉進士授仙居知縣政平恕先是

台州獲洋盜僅憑通事言定讞死囚多冤郡守檄治咸鞠勘
研詰乃俱商民以誤拒汎船被捕立出二十餘人罪台民德
之後緣事免歸歷主鷺洲中江聚奎河東書院年八十六卒
著有幾復堂詩古文集孫焜詳孝友昉詳忠義

萬承宗字梓巖年茂子嘉慶甲戌進士選庶吉士改都勻知縣
擢知府歷大定平越兩郡有慈惠聲歸田後主荆南書院旋
主江漢書院閱十五年造士有方先是年茂掌教江漢時承
宗生於講舍至是六十年仍主講席肄業生以世德作人稱
之生平於書靡不窺毫猶好學修江陵縣志又與邑人張履
恆同修問津書院志典覈詳贍車服禮器考據特精子鼎恩
詳忠義鼎勳詳宦蹟鼎宜廩生性孝友父病侍寢席衣不解

帶以憂勞成疾卒

張履恆字長溪嘉慶甲戌進士官內閣中書治易尤精周禮學
爲文清剛適宕力掃浮靡引疾歸杜門謝軌著述自娛主講
河東書院纂修縣志及問津書院志又嘗輯周禮以教學者
謝茨原名道塏字惕夫道光乙酉舉人幼聰穎喜博覽下筆數
千言如宿構初充嘉慶癸酉拔貢生學使鮑桂星奇其才曰
小謝清發今在子矣由是名動公卿閒後以大挑分發安徽
任霍山婺源等縣公餘仍勤著述古文駢體文均有家數尤
工古近體詩解組後嘯詠林泉誘掖後進惟纂修邑志一至
郡城著有惕夫詩鈔四十二卷年七十五卒

萬裕臨字靖園 恩貢生文藻華瞻教人以敦品勵行爲本嘗

主講河南正陽縣奎林書院縣最陋百餘年鮮捷秋闈者自臨掌教文風丕振屢掇巍科生平撰著甚多為時所重

王佐猷字介臣道光壬午副榜性簡傲勤學不倦為文謹守繩尺及門多所造就同治十一年重遊泮水年八十三卒

陳樾字晴嵐歲貢生天資穎敏於書無所不闕弱冠有聲庠序諸名士樂與之游性任達不羈年四十家居教子弟遇里黨寒峻輒資以膏火督教之終日坐齋中肆力蒐討聞遠近有異書必力致之里中推為通儒著有廿二史蒙求疊韻十六卷子堯松字東喬生有夙慧五歲善屬對年十九游庠食餼肄業江漢書院山長袁銑學使吳其濬朱蘭皆目為大器歲科課試屢膺首選道光乙未舉於鄉生平博通經史才思濬

發詩文皆闕中肆外著有史餘六卷及詩古文集年四十二卒時同族負文譽者芳字香山壬辰舉人固始吳氏延教授子弟以名德重於一時

汪士倫字彝仲歲貢生少以孝稱學問淵博為文師南豐詩學劍南教人以朱子小學為本尤喜徵文考獻凡三楚人物罔不搜輯論列嘗籌建杜茶邨祠並刊變雅堂集所著有春秋內外傳集釋皆散佚僅存挹雲書屋文集一卷西坡詩鈔二

卷

梅見田字菊階道光丁酉拔貢生方聞博學史漢文選每背誦如翻水而尤邃於經說經宗宋儒閒亦兼綜漢學制藝初近天崇漸臻正嘉體格詩古文卓然成一家言嘗受知於阮文

達公元哀給諫銑學使朱蘭尤激賞之性狷介喜默坐達官
貴人聞其名爭投刺輒避弗見侍郎馮譽驥督學楚中時減
騶從訪之議刻其詩文見田固辭馮作楚北遺賢歎詩蓋深
惋其數之奇也年七十九卒所撰著兵燹後鮮有存者弟儒
寶工詩蚤卒有瑞石遺草三卷

熊耀春字愛亭道光己亥副榜通經史凡所論述多發先儒奧
旨咸豐閒避亂山谷有所感憤採歷代兵事輯成武事類纂
一書布政使唐訓方見之亟稱賞將刊行會改官去未果

錢崇蘭字湘畹篤學有儒才工詩爲駢儷文淵雅有則兼治說
文學年十七補諸生由拔貢中咸豐己未鄉試初粵賊之亂
郡城未復守土官駐邑西之李集招崇蘭襄辦防剿頗著謀
體詩存四卷駢體文存一卷雜著二卷

蘄水縣

李見璧字元瑩生采子崇禎己卯舉人生平以著述自任家多
藏書縣令劉修邑乘多所訪詢一時壇坫之士皆重其詩文
黃正色曰元瑩詩有立乎詩之先者默然深思其於道也不
厭奪取而緩出之其推許如此著有宏圃文集宏圃楚詩四
書從信錄詮註劉養真易象義遺諸書

徐灝字若谷少爲諸生才名藉甚有汝南顏子之目順治初以

辟薦授本省潛江知縣旋告歸卒於家子孫淪落僧寮著述散失惟詩還一書見於官純滋文稿純滋稱其祥風善氣益溢眉睫閒於書無所不讀尤嗜洛閩之學語學者切己近裏斷古今是非成敗若燭照數計論五經如洪鐘發聲百谷皆應純滋固非苟於言者

高耀基字文中如岳子讀書目數行下工詞賦好樂府爲文獨抒己見不蹈襲前人一字順治辛卯舉於鄉著有溪潭詩六卷時同舉者陳璠字非石篤學有異才長於詞賦屢赴禮部試不第授臨潼知縣卒於官祀鄉賢有滌菴詩文集

楊繼經字傳人順治乙未進士累官刑部員外郎篤學工詞賦嘗輯邑乘於兵燹後搜殘補闕攷證者賴焉有菊廬詩文集

若干卷王士禎嘗錄其詩入感舊集中

參通志

徐暹字公石幼穎悟過人年十四補諸生旋食餼爲文自抒胸臆空所依傍父蕙映以宿學中副貢生母周氏有才學蕙映閨閣中嘗以詩文倡和暹素承家學又外家周氏文學萃於一門暹由是所業益進及明末闔家殉難獨暹墜城得脫故其詩多蒼涼悲憤之音

邢子植字邵士少以才學自負文詞鴻贍性跡弛不羈禮法之士或少之然多其才不以爲過也由康熙甲子舉人爲宣城教諭振興詩文士咸悅服同時有諸生李國琳每樂與談詩時相詰難及國琳老而後歎其非所及也國琳有牆東集草堂集

三十一

錢從燮字二友康熙歲貢生承家學窮經研史髫齡入泮試輒冠其曹為古文力摹西漢邑人從游者甚眾

桂陵字延陵啟芳子廩生為人奇偉倣儻詩文宗法眉山知縣劉佑置玉臺書院聘陵主講著易經四書正解理學正宗諸書燬於難子曰韻諸生亦有稱

南光發字璞子穎悟博洽隨父夢班之任淮安時長沙陳恪勤公鵬年以事過淮光發訪之投敗葺舍於夜月寒霜中商推古今達曙不倦以康熙癸酉拔貢試高等候補中書年三十五卒子昌齡自有傳

南昌齡字念貽光發子生四歲而孤寄食外家黃岡王氏蓋尚書澤宏孫女之子都憲材任之從女子濡染熏習十三即工

文詞年十七旋里四壁蕭然家破於宦心危於孤三世一身九棺在殯經營盤錯從破篋中檢殘書午夜篝燈枕經靡史以江漢澄清賦知名雍正十二年巡撫吳應棻以博學鴻詞舉乾隆元年九月

御試保和殿二次旋放歸益肆力論著尤沈酣於詩自謂始學松陵

倡和繼學義山晚嗜昌黎焉子心恭字伯容亦能詩奇氣碑

砥豪邁瑋麗卒屯鬱踴躍以諸生終邑人王雲輯昌齡詩曰

樗野遺詩心恭詩曰豆塍遺詩通志參先賢學行略

徐明理字澹山子芳孫少沈毅英爽為諸生時巡撫吳應棻以

博學鴻詞舉薦不赴乾隆辛酉領鄉薦主司陳兆崙稱其文

純古淵茂力追西漢嘗從莊有恭校士江蘇莊深重其文行

貴州府志 卷之十九

文苑

四十三

後截取知縣以病辭纂修邑志及廣濟志掌教蕪陽書院

徐立蘇字醒古廩生父本僊官雲南糧儲道蘇隨侍任所從楊名時游甚器之九歲爲古詩樂府十三歲爲東園賦灑灑數千言羣訝其工奔母喪往來滇楚以疾卒年三十

程光璵字抱璞幼穎異乾隆乙未進士選庶吉士益讀中祕書詩文博雅典贍掌院程文靖愛其才旋授檢討充

武英殿分校尋病卒

潘紹經字箬舟父伊超由優貢中副榜工詩古文教子有法度紹經成乾隆丁未進士授編修充

國史館纂修

大考一等遷山東道御史修八旗通志晉兵科給事中旋乞養歸

里歲饑鬻產活人無算生平博覽載籍長於撰述著有黃赤道經緯圖古文詩賦內外集諸書七十餘卷弟紹觀詳宦蹟胡文翼字有璞諸生少承祖訓研究經史兼治漢學乾隆甲寅舉於鄉三上春官不第遂不求仕進著有湖北水利考班馬異同考正杜工部年譜諸書

范世瑛增生博綜經史嘗手繪天文地輿二圖坊刻中有舛謬者悉正之受知於鮑學使桂星年八十二卒

孔時字務庵增生家貧力學枕經靡史邑名宿徐躍夏之魁皆推重之晚年教授鄉里門下士捷鄉會試者甚眾

徐躍字南墅嘉慶丁卯舉人博學能文楚督汪志伊阮元林則徐先後延爲上客作大洪山賦阮爲勒石官漢陽訓導值歲

饑勸富民設粥振卹全活無算致仕歸主講蕪陽書院巡撫張岳崧以經師人師額其閭重游泮水卒年八十七著有古文詩集如干卷宦蹟見漢陽志

聞斯行字勇齋嘉慶丁卯舉人石首教諭晉襄陽教授同治丁卯重宴鹿鳴性嚴謹嗜學兩主蕪陽書院成就甚多年踰九十猶好學不倦

陳沆原名學濂字太初號秋舫光詔子母周夢月入懷而生年十二爲諸生旣冠以優行選鮑學使桂星得其卷驚歎曰天才也中嘉慶癸酉鄉試己卯成進士

廷試第一授修撰性純孝母疾搏頰籲天請代父宦湘南沆輒欲棄官歸侍生平方聞綴學經史百家之書靡不閱覽爲詩古

文以獨到爲宗直與古作者並沆旣以文章雄海內負重譽士大夫造其門者日益眾時邵陽魏源官中書以博洽稱性簡傲沆與之交人謂沆且貴何折節乃爾沆不聽交益篤旣又與編修董桂敷姚學塽總督陶澍賀長齡主事龔自珍講求修己經世之學由是嚮道益力充然有得著近思錄補註十四卷詩比興箋四卷簡學齋詩文如干卷行於世壬午典試粵東癸未充會試同考官號爲得士卒年四十五弟澣丁丑進士授編修辛巳典試廣西官至江南道監察御史因陳言過激左遷主事子廷經詳宦蹟

蔡紹瀛字登夫拔貢生道光乙酉領鄉薦歷蒲圻枝江教諭隨州學正擢內閣中書友教都門多所成就河帥栗恭勤公毓

美遺其子弟受業著有刪訂古事苑諸書子興槐詳宦蹟

汪鵬字若山優貢生道光辛卯舉人授房縣訓導以振興文教為己任主講鄖陽房縣書院條約嚴明講學不倦及門中多賢達如賀壽慈彭久餘梁肇煌陳廷經其最著者子名登副貢生掌教安陸府及京山竹谿各縣書院造就亦多遭父喪哀毀成疾逾年卒

徐肇梅字蜀溪谿達有大志下筆灑灑千言無塵壒氣同治壬戌進士選庶吉士改吏部主事例授四川直隸州知州生平著述甚多毀於兵燹賸有壺齋詩古壺齋雜錄若干卷

范昌棣字季常增生父德煒由舉人授興山教諭昌棣天資穎異博覽載籍學使張之洞創建經心書院選高材生十數人

肄業其中昌棣與焉試江賦用禁體張得其卷甚歎服以謂己不能及也遂置第一頃之以疾卒於齋舍張悼以詩有使我楚江無顏色之句

麻城縣

鄒知新字師可幼穎慧力學不輟明崇禎壬午舉人順治八年選宜城教諭造士有聲陞萊陽知縣以解逃違限解任歸著有縣志十四卷文簡事該惜未付梓然後之秉筆者多取裁焉

王汝霖字用肅諸生少有文名為文援筆立就督學王發祥歎為當世史才知縣王潞嘗以邑志屬其纂修會遷去不克授梓庚戌志成多所採取

周禮字在魯順治己丑進士會

詔進士有願從軍者聽禮從大軍下廣東授高州知府遇事果斷不畏疆禦清理獄訟忤權貴放歸以詩酒文章自娛家無儋石晏如也與黃岡奚祿詒同修郡志體裁謹嚴年八十餘卒

李春江字公楫少以神童稱年十三冠童子試旋食餼十六以拔貢

廷試第一授武昌縣教諭與譚元春劉侗艾南英皆為文字交子中素自有傳

周維秬字錫貞康熙癸丑進士授沈邱知縣未赴官歸少聰穎博學負文名知縣屈振奇修輯縣志維秬多所參訂當時稱善本所著有蓼園文集藏於家

李中黃增生少孤事母孝博極羣書富於著作知名士咸心折焉

李中素字子鵠春江子歲貢生少孤性孝友倜儻多才詩古文詞下筆立就素聞沛上閩爾梅名千里訪之不遇遙贈詩十首後爾梅得詩京邸諷誦不輟名動公卿晚授湘鄉教諭主岳麓書院已而以卓異遷閩縣知縣調繁臺灣有惠政值野番滋事計擒渠魁餘黨悉平卒於官

李佐字良哉號螺峰諸生好讀書不修邊幅善書尤工詩著有坡鄰堂詩集同時劉振鐸字省吾亦以書名一時

董天策字克勤康熙歲貢生以春秋教授生徒遠近學者稱柳溪先生知縣姜櫛特致尊禮顏其所居室曰名重江都

黃州府志 卷之十九
胡鉉字震軒躍龍孫廩貢生少好學通經術尤精易義壬辰鄉試薦不售遂絕意仕進益肆力詩古文詞知縣劉希向甫下車訪縣名宿往謁首舉弭盜安民數大事悉見採納既乃匿跡山林絕不通款曲希向益重之著有端池文集六卷震軒詩集二卷子翔靄詳宦蹟

張文藻字華圃道光丁酉拔貢生賦性瀟灑喜音律工書法詩宗韋柳文得歸方門徑督學朱蘭江漢書院山長袁銑深器異之晚歲寄情山水獎掖後進名彥多出其門著有小山書屋文集琴泉詩存藏於家

楊正楷號靜菴 恩貢生家貧嗜學師事同里宿儒田子元問立身爲學之要子元教以一誠字正楷守其教得盡通諸經

有所發明於易尤邃所著說易之書數十巨編兵燹後蕩然無存士論惜之生平精力瘁於經術閒治古文詞絕去凡近嘗仿白居易秦中吟爲新樂府十章諷時政知縣鍾榮光深歎異之性篤友愛鄉黨無閒言子元卒貧無嗣正楷歲分脩脯贍其家終始如一

黃安縣

盧之懷字敬生順治初歲貢生九歲能屬文補弟子員旋食餼未冠博通經史明末避亂山砦眾爭攜財物之懷獨載書籍朝夕諷誦後歷任光化新甯兩縣訓導

程一棐字坦之諸生寓岐亭遇寇焚掠一棐以溼絮蒙其母突火出乃免性好學淹博敏捷日可成三十藝順治甲午舉於

鄉官武昌府教授甲寅之變士多遠徙學使按籍除之一裴力爲請復數百人尋擢國子監助教致仕歸卒年七十一
王延字紫茹少孤七歲能屬文長博通經史年五十始受知於
郃學使拔入郡庠歎其抱才久困且叩生平所讀書益歎服
卒以諸生終

張希良字石虹百程子康熙己酉舉於鄉爲江夏教諭甲子與
修通志乙丑成進士二甲第一授編修戊辰分校禮閣擬撰
五嶽異名濟瀆源流 京師形勢策問總裁大學士王熙歎
曰張公可謂博物君子矣歷左右春坊贊善纂修

三朝國史

大清一統志明史春秋講義類函稱

旨賜

御書白羽扇賦累官侍講督學浙江致仕歸年八十二卒希良所著
有春秋大義宋史刪文章宿海格物內外編諸書其詩文爲
士林推重出門下者多所成就子欒詳孝友

吳應庚字遠齡少孤穎敏力學博極羣書成康熙己未進士授
隆昌知縣以廉能擢吏部主事晉員外郎公慎自矢坐累遷
光祿典簿陞署正謝病歸著有冰鑑堂三楚文獻錄蜀史備
遺及詩文等集

吳宏初字慎旃之珍子康熙歲貢生應

廷試第一授邵陽訓導修學宮置膳士田於學政無不修舉丙子
領鄉薦尋解官歸益肆力經史知縣劉承啟修縣志多資其

討論子羽鳳貢生文鳳諸生皆孝友積學孫沂詳宦蹟

吳世模字文次性澹泊不事生產從伯兄世植學事之如嚴父為文閱肆如萬斛泉湧康熙癸巳成進士充

武英殿纂修授四川重慶知府蒞任未久卒

江宗字長文年十四補弟子員為邑名士屢薦未售張侍講希良督學浙江聘閱試卷稱其詩文棋酒字為五絕以歲貢授江陵訓導未任卒

張忠坦字笏山炳鯤子乾隆辛卯副榜歷任宜都房縣教諭乞養歸生平敦品誼說經娓娓不倦乾隆乙巳戊戌嘉慶壬戌歲饑皆捐貲振卹丁巳春豫匪竄境團練鄉勇保障一方子錫謙詳宦蹟

張錦珩字如亭父智坦諸生有隱德錦珩學問深醇登嘉慶己未進士官吏部郎中遷雲南道御史授南安知府倡修校士館以便試者所拔多寒畯引疾歸歷主鷺洲墨池河東書院清修樸學為士子矜式

盧曠字鏡亭博學能文尤耽吟詠少遊山東有岱游草尋主河南雪香東周書院以父艱歸廬墓三年服闋睢州牧復聘主襄臺書院有洛游鞏游嵩游等集已而歸里邑令孫延主萃英書院歷十餘載年七十嘉慶庚午始以優貢生入都有古今體詩數卷道光二年纂修邑志生平澹然無欲藹然可親從游者多知名士節縣藝文志本傳

盧鴻遠字秋渚敦品積學教授生徒列膠序取科第者不可枚

舉道光丙戌成進士以知縣分發廣西署新甯州未上卒

彭煥興字小眉國梳子幼穎異年十四補諸生每試輒冠軍嘗

北遊皖豫南走星沙江山勝概往往發為文章至道光丁酉

始舉鄉試第一年已逾五十矣性澹泊不樂仕進立家塾課

子姪姪宗達詳忠義

盧繪雲字素備道光丁酉舉人性孝友家貧嗜學博通經史為

文縱橫百變一歸典則尤工詩賦主萃英書院講席門下多

掇科第年七十餘卒

毛五齋字燮臣少穎異從同邑劉秉琳游博覽載籍寒暑不輟

咸豐戊午舉於鄉同治辛未成進士

朝考第一選庶吉士授編修居京邸手不釋卷鍵戶讀書寡交游

所著詩文一時推重卒年五十四

羅田縣

雷天鐸字四聞抗志希古倜儻不羣康熙丁酉舉人戊戌成進

士選庶吉士邑之人詞林者自天鐸始文章爾雅為後學矜

式

朱文魯字禮在少孤敦品力學雍正甲辰舉於鄉學先躬行以

居敬窮理為要文章雅潔啟迪後學成就甚多子維鼇歲貢

官監利訓導培植學校士服其教

葉繼煌字廷輝廩生英姿卓犖歲科試輒冠其曹比長學益進

掌教義川書院邑先達多出其門族有鬻子者三人皆贖之

拾遺金立還其人

匡鼎乾隆乙卯優貢學問淹雅爲文力追先正受知於初學使彭齡以大器相期許屢躡棘闈遂絕意仕進投徒江漢閒門人進士古韻最知名

郭先庚字巽亭歲貢生爲文出入經史自成一家言家居教子弟以躬行實踐爲先里中來學者多所成就子潤舉人爲永福知縣有政聲

陳瑞球字韻石景程子少負異稟文章根柢經史年十六補諸生嘉慶己巳成進士選庶吉士改武甯知縣因俗立教民情大和調樂平地濱鄱湖有水患迺捐俸築隄防數十處徧植榆柳瑞球常率僚友置酒賦詩其閒有往訴者就隄上判決之性彊直巡撫某銜之劾免尋起內閣中書充

國史館分校素嫻掌故當事倚重以艱歸服闋時已垂暮矣後視

弟瑞琳中州卒於道

節縣藝文志墓誌

陳瑞琳字九香景程次子宏才博識詩宗法眉山風調清深脫棄凡近獨步一時道州何侍郎凌漢奇其才爲序其食古研齋集鏤板行世瑞琳自少時已名滿江漢久困諸生援例爲府經歷官河南歷署桐柏葉縣鄆城知縣所至卓著政聲詩名尤噪豫中季弟瑞琚字兩玉拔貢生應山教諭詩與琳同宗派頗饒氣骨子昌綸自有傳

廖驄字方雪歲貢生奎文閣典籍博學能文詩宗玉局好游覽凡遇名勝處多有留題著有介生樓詩集

朱輝藻字翔坦道光丁酉拔貢爲文湛深經義書法清挺具體

歐陽率更晚歲家居授徒兩主義川書院講席教人敦本崇實以經術節誼相切劘成就甚眾

節縣藝文志墓誌

陳昌綸字凝甫瑞琳子道光甲辰舉人官內閣中書天姿穎異博涉經史尤工詩應童子試有句云煙雨隔江詩人畫雲山到楚氣都奇知府楊庚亟賞之後隨侍梁苑北渡黃河覽太行王屋諸勝得山川之助詩境益高陶閻學樑祁相國窩藻皆愛其才年四十餘卒著有量齋詩鈔无行所悔之室文鈔時有熊五緘字素卿廩生聰穎絕倫爲文有根柢亦不永年士林惜之

蕪州

李炳然字人虎號東皋崇禎丁丑會試登乙榜授吏部司務出

知萬安縣尋告歸爲人溫文爾雅不苟言笑研究諸經義疏老而彌篤州人士治經學者皆賴其指授年九十餘卒

汪衡字蘭友順治己丑進士授南平知縣政尚簡靜尤加意士類公餘課業多所成就旋移疾歸詩酒自豪與李炳然盧紘以文章氣誼見重一時

張正志字爾思幼讀書目數行下窮究諸史百家爲文法歐曾與顧景星李炳然時相考證順治壬辰成進士任衛輝府推官剖疑獄一郡稱治因直見忤謫州判遂致仕歸

陳之京字覲伯順治歲貢生學淹博與同里李本晟盧紘結詩文社盧李皆通顯之京累試不售遂卜築山中肆力詩文著有叢桂堂集

張士淑號蘧庵順治歲貢生黃梅教諭值兵燹後廟學無存士淑竭力經營廟成規模宏整當事奇其才命攝縣事多善政以終養歸著有秦餘草雲溪雜著等書

李春期字子疇師事伯父炳然以倡明學術爲己任精研經史務探本源年八十一卒著有石圃澄源錄二百二十卷

劉遐祚字菊潭康熙癸卯舉人歷官銅鼓衛教授興國州學正時諸生有盧姓被仇家誣陷遐祚爲白其冤酬以金不受詩文有奇氣辛酉應貴州鄉試同考聘稱得士孫萬甯詳宦蹟曾孫之棠自有傳參通志

顧昌字文饒康熙癸酉舉人風采雋逸善作古體文工詩賦以父景星所撰著徧謁諸名宿從之游卒得荔軒曹寅編輯白

茅堂詩文集行世昌亦以勞瘁卒

陳其勅字五惇康熙歲貢生博涉羣書詩古文援筆立就姪道兼歲貢孫鼎元諸生皆克承家學鼎元詳篤行

陳謨字友夏康熙歲貢生嗜學好古教授生徒多所成就著有尙書講義茹堂偶草諸書

晏昇字東白據忠子康熙歲貢生高才博學名動一時嘗爲雲門社長時盧紘在蘇松督糧儲參議任所修蘄州志顧景星與焉數致書訪遺事名宦科目多出昇手年九十補穀城訓導辭不就

李生槃號兩峯生甫三月失怙母諸氏撫而教之通經史百家言爲州學生有聲雍正五年以賢良方正舉後應聘修湖廣

通志多所考正著有尙書義疏四卷兩峯詩文集十二卷

李易生號連山歲貢生有夙慧經史百家過目成誦所作詩

古文詞力追先正著有連山全集藏於家

參通志

駱沛霖字宗雲幼失怙好讀書每試皆列前茅工部陳詩謂獨

出冠時宜其有以異於恆人也舉乾隆乙酉鄉試歷武昌府

學官游其門者甚眾秩滿截取知縣未仕卒著有易經纂說

胡薰字輿載號蘭亭少穎異乾隆戊子舉於鄉知州胡齊崙以

孝廉方正舉辭不赴志耽經籍勤於撰述著有周易晰言尙

書集義詩經詳詁禮記纂特牲饋食集訓春秋通解鄉黨類

考諸書門下通經術者數十人卒後陳詩誌其墓子愿字汝

誠以歲貢官荊州訓導學行亦有稱

陳詩字觀民號愚谷博聞強記舉乾隆甲午鄉試第一戊戌成

進士授工部主事以母老乞養歸母憂服闋主江漢書院遊

其門者多楚中名士聲譽震一時雖王公大人莫不存問嘗

總修湖北通志道光二年自江漢歸蘄州至老猶以著述爲

業卒年七十九卒之夕大星隕於湖之東南士類咸悲慕之

生平於經史子集各有著作俱詳藝文志崇祀鄉賢

劉之棠字憩亭萬甯子十歲能屬文篤志力學涉獵羣書爲文

閎博淵雅乾隆甲辰成進士教授子姪多成名年四十七卒

著有憩亭詩文集

參通志

陳本中字爲山初爲諸生性耿介不諧於俗讀書慈雲閣幾三

十年苦心孤詣務求根柢一時績學能文之士推本中爲翹

楚道光壬辰始舉於鄉年已暮矣家居講學成就後進甚眾
張聯璧字次徵天資穎敏博涉羣書詩文儕輩罕及補諸生肄
業江漢書院文名益噪舉道光庚子鄉試江西學使張芾聘
閱試卷甚稱其才年五十三卒

黃體仁字靄人幼孤受母氏楊教苦心勵學爲詩古文彬雅可
誦道光甲辰舉於鄉再上公車絕意仕進壬子纂修州志裁
定多出其手惜著述經兵燹散佚無存

吳之驥字展其道光丙午優貢考取教習改知縣不就喜著述
文宗選體詩法劍南書得義獻筆意著有蜀船草伴星廣唱
集林蘭堂文集

何明號雪園家貧樵牧養親年十九始感憤讀書值暑月以松

柏屑能避蟲日市村落閒得錢易米夜卽燃以照讀咸豐辛
亥舉於鄉上禮部不第遂肆力爲詩古文才思橫溢下筆千
言性嗜飲豪宕不可一世名藉藉動京師澹於仕進喜獎掖
士類同治三年選廣通知縣乞改教職授宜城教諭從遊者
不遠數千里負笈而至未幾卒於官著葵藿齋古文若干卷
廣濟縣

劉醕驥字千里號廓庵祖秉錄父洪芳皆績學有名醕驥生而
有文在手曰歷里媪饒一見奇之許字以女留居親授句讀
十五入邑庠每恨宋元以來文習日卑孱因奉左國史漢爲
繩矧詩宗初盛唐五七言近體尤雄深雅健或苦其文生獯
冓兀幾不可句醕驥益自喜更曲折興盡乃止年過壯始悔

黃州府志卷之十九
雕篆日取周程張朱象山慈湖餘姚山陰內江書浣劇植蓄
崇禎十五年督學高世泰聘修楚四朝文獻錄順治四年督
學王念尼聘主通社以歲貢當上公車因入京與魏裔介曹
本榮魏象樞講業極歡或勸仕爲有司者醜驥曰吾固不任
是遂歸與同里張仁熙倡長風山社力振楚風湖廣兵巡參
議李呈祥分巡興國躬率博士弟子數十人以師禮迎至赤
庵康熙五年由吳入燕道曲阜謁孔墓作文告 聖廟十二
年有

旨修直省通志布政使張九如徵醜驥等分局著書未及成而止十
四年卒醜驥貌頎而癯好深沈簡默介然高岸語無擇貴賤
不可狎或告宜委折盡人情不可強也不善治生產以故貧

窶沒至不能具棺衾焉祀鄉賢著有芝在堂集弟醜駿詩文

亦有聲

居業齋集

案醜驥與族祖秉鈔齊名秉鈔字幼凝以醜驥年少長降
其尊相容接休戚必共顧景星詩云梅川二劉絕可憐還

鄉遙望復經年開書借問新秋色只在疏籬苦竹邊先賢學行略

張仁熙字長人順治歲貢生家大江濱之藕灣父楚偉天啟甲
子舉人好遊所至有詩著雪巔集仁熙年十一屬文有奇氣
父早沒仁熙廬墓生芝因編古孝行十卷以自勵事祖父母
歷三十年及沒復廬墓側鄉人賦孝子慈孫歌方流寇躪楚
職方楊卓然擬安插降賊於蕪黃山後號曰新民仁熙上言

黃州府志卷之十九
武侯兵民雜處渭濱而不亂以屯田耳今新民實賊也坐食民粟而弗佃舊民之畝不數月新民去而蠶食他方舊民還而寄命空谷蔓延濡染可爲寒心灑灑數千言職方見而噫之卒不能用警至避地蘄州蘄破還走藕灣檢殘書讀之與劉醅驥顧景星以詩學相切劘有聲江漢閒商邱宋犖官黃州通判時賓之雪堂世所傳雪堂墨品仁熙爲犖作也當事以隱逸薦辭不出康熙癸丑甲子兩修省志年八十四卒祀鄉賢子四佳勛佳晟佳昂環金皆積學能文佳晟詳宦蹟從子佳景字斐瞻諸生博覽羣書尤精春秋於諸儒異同多所辨正卒年八十一

參先賢學行略

王臨本姓朱字泰生累世同居以孝義聞臨補諸生家貧力學

曲盡孝養嘗作禹貢圖河洛攷胡篤生亟稱之流賊至見臨坐大松樹下執卷微吟賊魁梁廷柱素知書夜燒炬出所挾書相質天明揖臨揮刀去後因江行避雨得邑殘志於村店前後失次其存者又率略不雅馴遂慨然以修輯爲己任詢故老訪碑碣勒成全書時稱善本

王志入隱逸今依縣志移入

陳文濤字濤生時泰子家世敦尚躬行濤謹守家法其所著徵古堂類稿論學諸書由程子主敬以通新建良知之旨有功後儒

舒逢吉字康伯益生子康熙歲貢生天資敏捷文不加點兼嫺韜略參副總兵王宗臣幕討山賊有贊畫功後任瀏陽訓導上官知其才令攝縣事判決如流獄多平反著有綜雅百卷

詩文集二十卷弟峻吉遂吉皆以文行知名時有河東之譽
峻吉自有傳

案逢吉值明亂遁跡緇流走塞上入蜀遊京師歷大梁返
儒服主講上蔡書院輒軻悲憤盡發之於詩施閏章題其
北征詩有悲歌終古聞燕市絕調何人復楚騷之句參先賢學

舒峻吉一作峻極字漸鴻父益生明季避亂至豫章與南昌彭士望

胡以甯輩為明宗室奉國中尉議霧之友見魏禧朱中尉傳
峻吉自少隨侍得交海內賢豪後歸里補諸生久不遇遂棄
舉子業攻詩古文旁通金石篆法兼三橋雪漁之長行草尤
酷似米芾為人抗直任俠友人劉子杜才而天為文告其靈

以女字遺孤王乘卒督課為名諸生他質行多類此著有章

園集參先賢學行略

案峻吉同里王衍治字恂度萬歷時名臣大謨之孫歲貢

生廷試入都不更謁一貴人獨與施閏章王岱交著柳

舟稿閏章謂宋元得令之日獨操唐音其歸也閏章送之

詩曰先朝遺直有聞孫江漢風流詩卷存鄉夢只懷三徑

竹貴遊愁向五侯門娛親膳美將魚膾送老吟多坐樹根

赤壁磯頭歸棹遠更期何處共清樽先賢學行略

金德嘉字會公號豫齋之純子生五歲而孤與伯兄德崇事母

朱至孝年十五遊於泮旋食餼舉順治庚子鄉試官安陸教

授凡九年康熙壬戌會試舉第一授翰林院檢討史館推為

碩儒莫能望其肩項凡遇編纂職務殫思萃力若明史列傳表揚殉節諸臣一統志分撰楚省諸郡以及禮記解義通鑑講章鱗次就藁最夥丁卯典貴州試得士多名俊致仕歸荒江寂寞蓬蒿滿徑斗室中圖書充塞兀坐編摩寢食不倦撰述歌詠卷帙不下數十足跡不入城市幾二十年卒年七十有八門下士私諡曰貞孝先生祀鄉賢子啟洛啟汾俱克世其家學洛詳宦蹟汾自有傳

郭存會字聚五諸生敦行績學詩文日有聲值歲饑有鬻其少妻於存會者既至贍其有憂色詢之急還其夫費錢二萬不計也性好遊闕里廬山諸名勝所至輒記之成帙闕里記伍涵芬選入日華堂集聖節會約仇滄柱選入小學大全卒祀

鄉賢子元哲好施與鄉里多受其惠

阮文茂字駿公康熙歲貢生事父母以孝稱沈靜嗜學寢食幾輟與同里金德嘉以文章相引重年七十七卒著有竹巖詩文集

張惟金字貢方步雲曾孫少孤績學事母孝弟早世撫遺姪若己子弱冠補諸生旋食餼試輒冠其曹所爲詩文雄奇瑰瑋尤邃性命之學言動悉有矩矱康熙辛卯舉於鄉授江陵教諭諸生以文字就正者無虛日一時上官悉遣子弟就學焉致仕歸年八十卒門人私諡曰貞文祀江陵名宦祠著有黃嬭堂詩文集子易源德源俱進士學行有稱禮源廩生以黃鶴樓賦知名知州蔣尙德延主麟山書院

魏洪賓字玉岡尚忠子增生酷嗜詩書尤精周易與郭存會阮文茂張惟金以文學顯名年八十餘猶能蠅頭細書好學不倦子昌期亦以著述自娛孫雲瑄詳宦蹟參通志

金啟汾字禹甸德嘉子雍正歲貢生爲古文詞原本性靈貫穿經史而法派一本震川尤喜爲詩出入眉山劍南閒兄啟洛沒於臺站躬迎其喪舟至蕪湖病卒年六十一從弟啟江字同九康熙乙酉舉人詩文亦有聲子業講詳孝友

胡復亨字仲克魁楚孫年四十補諸生其學無所不窺一以程朱爲鵠深疾嘉隆以還講學標榜之習四方以書幣來者謝弗往晚築補山樓讀書其上學者稱補山先生年七十八卒兄肇亨字孟嘉諸生博通經史工詩善書

胡本燾字容卿儻不羣年十三通經史兼治古文詩賦賦種花詩有一葉去留禁俗手半枝晴雨奪天心之句弱冠舉乾隆丙辰鄉試屢躋春闈益肆力於學生平敦孝行尤以誘掖後進爲己任

胡本燾字赤韜廩生工詩賦作竟陵詩歸論朱學使激賞之每試郡人士輒相從問奇字仿李長吉錦囊得句輒投其中乾隆十四年與修郡志著有研北草堂詩鈔

張光遠號施庵乾隆庚子舉人屢上禮部不第博聞強記儕輩莫之及性和平樂易有以疑事質者爲反覆辨釋晚任江夏教諭殷勤課士彷彿蘇湖遺風

陶金冶字范之博學多聞工詩賦嘉慶癸酉拔貢生督學鮑桂

星深器重之主滄浪書院十餘年游其門者多獵取科名以去

饒豐字芑坪玉振子性孝友事父母能得其歡心與兄儀晉儀鼎有怡怡之樂好讀書於六經諸子靡不研究尤精於史漢道光庚子舉於鄉庚戌成進士以知縣用分發江西未幾卒朱澤楠字小西父錫昌諸生家貧授徒自給父卒益貧寔落魄無所之至黃岡樊東陽范斌一見異之斌留之家塾越數年補諸生咸豐壬子舉於鄉署武昌府教授蒞任三月卒澤楠性通敏善屬文博涉傳記兼工漢隸豪於酒與朋輩飲酣縱談今古辨論不少休嘗與樊范陟廬阜游錢塘觀廣陵八月濤所著詩文益放逸灑灑絕俗洪侍御良品序其集

胡醕字雪舫諸生貌寢而羸性簡易不工爲寒暄語篤友誼朝夕切劘必推懷相與有過則面斥之弱冠卽工詩值粵賊亂猶以詩提唱邑中繼軌劉醕驥長風山社故事詩境益進未幾卒年四十八著有聽香閣詩集

黃梅縣

陳夢弼字帝侯康熙歲貢生少靜默研心古學與蘄州顧景星廣濟劉醕驥爲文章友築南邨別墅著述其中今所傳者僅北遊草一帙

黃利通字曉夫幼穎異不羣康熙甲戌進士授賀縣知縣有政聲會征八排瑤人利通上平瑤策計在於兼用鄉兵尤在於以瑤平瑤帥府嘉之旋擢吏部主事丁憂服闋補工部營繕

司主事逾年告歸僻處太白湖濱斗室蕭然歌聲出金石閒
出游不輿不蓋一蒼頭擔簦隨之堯童釣叟往往指目爲措
大詩不削草頃刻數十首極揮灑之致古文豪邁不能拘以
繩尺與到伸紙疾書紙不擇嘉惡書已出戶外長嘯逾阡陌
巖壑阻絕乃返有石亭懷亭等集高安朱軾長沙陳鵬年爲
之序從子之騏自有傳通志參先賢學行略
熊恢字溥含康熙庚子舉人是科直省中式多知名士而恢更
以孝友廉潔爲同人所矜式當時黃梅有五子之名恢其一
也

蔡洲字瀛洲爲人質直不假修飾見人輒畏縮若無所容及飲
之酒則縱論古今旁若無人叩以經史疑義靡不引伸曲證

剖別毫芒爲文冥心獨造去其鉛華非世所好以諸生老
一黃之騏字孟閑家貧好學世父利通以詩古人名一時梅與荆
豫揚三州接壤以文事來質者無虛日之騏既承指授又與
諸名士相辨論其文章遂自爲機杼成一家言有志學齋詩
文行世年六十由歲貢舉雍正己酉鄉試乾隆元年

恩賜中書舍人

李枚字西卜諸生博通經史尤精三傳爲文援引考據縱橫馳
騁極才人之致年五十受知於督學溥有德延致幕府時馮
詠儲大文在幕中咸相推重聲名振江漢閒未數年卒
喻化鵠字岑居一字物外歲貢生先世由麻城遷梅種德績學
化鵠尤振其緒與同里黃之麒熊恢李枚蔡洲稱黃梅五子

化鶴十三齡爲諸生有聲不樂進趨刻意論著時金壇王步青評隲四書文別裁僞體桐城方苞以古文爲天下倡化鶴既私以自厲又與兩人往返辨論遙相應和所爲古文多苞點定制義則步青爲之序且掇其尤者入選本然化鶴竟無所遇充貢入太學而卒爲人長身玉立發聲若洪鐘藏書萬卷博覽多聞策健騾歷游吳楚嘉山水詩清癯而以骨勝不多作兼善書法初學李北海晚乃工懷素大草人爭寶之葺苑園於城西隅以待四方賓客有自知堂一勺亭留耕山莊以俟書屋諸勝號苑園老人孫本鑰輯其文曰素業堂雜著從孫文整自有傳

參先賢學行略

程士煥字肇文諸生幼嗜書過目成誦母慮其弱禁不予膏火

士煥私買香熟之引光就字遍覽經史子集晚棄舉子業杜門著述著有洛水年譜先世彙言南湖藏稿等集藏於家余函秀字賞真乾隆甲子舉人性闊達不事拘束詩古文皆攄寫性靈而制義奧衍精微窮極幻眇應城程大中亟稱賞之

參通志

李本質字義民乾隆乙酉拔貢詩古文倔強豪放在太白長吉之間爲海鹽朱學使丕烈所獎許著有自覺堂詩古文集胡如炳字虞濱乾隆歲貢生文筆閎博知縣薛乘時見之驚曰子黃岡後身也題其稿爲嗣劉集時修邑乘卽屬襄輯成編石元吉字文藻父志陞諸生少孤力學事母至孝元吉承庭訓爲文雄奇跌宕兼韓蘇之長以其餘力旁涉靈素時稱絕技

乾隆辛卯丁酉兩舉副榜遂棄舉子業肆力經史官崇陽教諭受聘修棗陽縣志歸里後纂修邑志具有史裁著有易經遵聖春秋闡義周禮爾雅旁訓等書均稱善本族子本盛字一泉乾隆戊申舉人官武昌訓導卒後編修余集戴均元授其文稿爲序以行世

黎孟鈴字嶼東乾隆歲貢生初入泮縣府院三試皆冠軍博覽經史爲文雄健有根柢與石元吉稱莫逆交尤講韻學體例同異辨晰精詳

喻文鏊字治存于智孫有道詩人也學者稱石農先生乾隆閒以諸生充恩貢後注竹谿教諭辭不赴年三十以詩名本篤行爲文章一門百口謹受教約子弟讀書能顯其名性通

介絕俗弗矜岸異當時賢士大夫比比傾慕求一識面莫可得尊禮之無近遠也居里鄙聞善必揚有過者從容含和待其自化生平盛德事不一默默內信不以語人守道之專如此古文入韓柳之閒詩法昌黎已乃鑪冶百家學與才副嘗游梁宋秦隴閒山川靈奇奔躍腕下詩遂以成今所傳紅蕉山館詩集是也又著有考田詩話八卷紅蕉山館古文八卷湖北先賢學行略不析卷行世無錫秦瀛序其詩萍鄉劉鳳誥爲之跋上高李祖陶序其文見各集中子元鴻自有傳喻元澤字惠伯文鑑子嘉慶庚午舉人教習考滿當得知縣以病歸主蘄州麟山書院學問淵博尤精攷據著有訓詁補義地輿沿革考文選集證等書

喻元鴻字太冲號鐵仙文鏊子附貢生幼構思苦遲鈍十七八時閉戶瞑坐三閱月忽灑然悟下筆成篇一空前人壁壘經義外尤善詩歌古文著述多種閒以餘力從事篆隸鐫刻金石贗真一見立辨性廉靜一門昆季取青紫者纍纍獨絕意進取敝衣粗食當承平之時常若有無窮隱慮於考田山中築菟裘老焉未幾粵逆陷梅城內一片焦土而山中藏書如故蓋識超也著有古文詩集若干卷初彭齡陳詩張維屏俱爲之序上高李祖陶曰匏園文和雅似歐石農文奇崛似韓鐵仙文敷暢似蘇祖孫父子一脈相承而面目各別文之所以真也又有觸書家範三經雅言詁餘學庸貫諸書待刊陳元吉榜名煥字堯墀嘉慶戊辰舉人品行端重學問淵博精

考据成書多種其鄉黨三考四書疑案暨經解同邑帥承瀛謂其融會眾說辨晰詳明嘗遊江南名家世胄爭師禮之主講海州力闢風氣成就迥異尋常晚官鄖陽訓導

黃經塾字煥書號滌泉少英敏有大志緣先世遷梅未久思自立門戶折節讀書有聲庠序生平篤內行重然諾里有爭隙輒排解之人咸服才名益著以歲貢舉道光壬午鄉試第一癸未大水房師張維屏適令梅凡恤災修隄諸務皆所贊畫保闔邑災黎後館江西撫署值大水撫軍趙炳言塾座師也復以施於梅者陳之趙奏撥帑下諸州縣全活無算晚年著有日知錄四書便解地理質疑待梓

蔣恩濊原名倣濂字酉泉道光乙酉舉人爲文清矯詩尤駘宕

閒曠詞亦工秀嘗游許乃普學使幕書記序傳多出其手著
有竹林老屋詩鈔陶閣學櫟為敘刊之

吳鈺字式道光辛卯舉人年二十即知名制義出入大家詩
古文亦卓然不染時習上公車十四次不第晚掌教調梅書
院著有聽桐軒詩文集弟鑠字衢尊己亥舉人亦工詩著有
祛塵子集

余錫椿字培園道光甲午舉人幼孤受業伯兄廷蘭為詩歌古
文賦尤敏異長與黃岡汪士倫廣濟徐黃中同邑吳燦如為
石交邑乘遺佚缺略搜求考訂錫椿之力居多燦如字杏墅
諸生自幼岐嶷詩文饒有天籟所著兩山詩草灌木樓等集
皆瀟灑出塵

洪基字福生道光甲午副榜性聰穎善草書邃於經學初年教
授生徒課時藝多獲雋登上第者晚閉戶卻掃訂古今譎誤
求真是著周易釋義學庸辨考尤精者聲韻徵經一書積日
累月冥神會悟破切反之說引諸書互相證勘著其得失大
致等於顧氏本音段氏音均而簡明過之又著有十三經得
閒萃言漢史辨疑地理辨正詳訓等書均有功後學會受宿
松劉令聘主講松滋書院

蔣夢樓字岑南道光庚子與弟奎樓同舉鄉試幼敏異工詩文
年二十補諸生肄業江漢書院與一時英俊遊往來唱和錚
錚有聲嘗入西蜀東遊聞得山川之助故命筆絕無俗氛奎
樓咸豐壬子成進士授戶部主事性疏放在官不名一錢年

黃州府志卷之十九
五十餘卒於京邸

補遺

黃岡縣

龔斗南號小梁嘉慶癸酉優貢生性孝友工詩古文詞尤長於書法初學歐趙晚年益蒼勁雅近鍾王名噪江漢聞尺幅寸楮人爭藏之由宜城訓導擢雲南府經歷年六十卒於任著有小梁詩集

明

詹馭字三畏同之裔孫少負奇姿十歲為名諸生從學於羅洪先輪貢讓後人者三卒年二十九

此傳玉志未載茲從雍正癸丑湖廣通志補錄

黃州府志卷之十九終

